

DISPUTATIO ACROAMATICA

DE

CHYMIATRIA SUPERSTITIOSA,

Quam

Speciminis loco

*Eruditorum, maxime Philiatorum,
disquisitioni subicit,*

& ita

prudentem præcautionem
commendat

Johannes Jacobus Rock,
Physicus Gelhusanus.



BUDINGÆ,

Typis Joh. Frid. Regelein, Typographi Isenburg. Aulici.
Anno MDCCXIX.

IMPERII ROMANI
Liberæ Civitatis
GELHUSANÆ
SENATUI GRAVISSIMO
VIRIS SPECTATISSIMIS

Fautoribus atque Amicis honoratissimis,
tanquam specimen inaugurale

*Physicatus ab ipsis sibi demandati, eo, quo par est, honoris cultu
offert ac dedicat*

hanc Chymico-Medicam dissertationem

JOHANNES JACOBUS ROCK
Poliater Gelhusanus.



I. N. J. C.



Nter omnes leges præceptaque, quæ in S. literis nobis proponuntur, illud maxime frequens est, iteratisque vicibus cum plurimis annexis pœnis repetitur & renovatur, quod loquitur de Idololatria & *superstitione*, quippe quod etiam primi statim *Decalogi* præceptis fuerit subjunctum. Cum enim DEUS omniscius indolem istorum vitiorum, quæ hominum animos a vera ejus cognitione legitimoque cultu abducunt, perspectum haberet, & simul etiam intellectus nostri imbecillitatem, voluntatis depravatæ malitiam, quippe quæ, uti & ille, maxime in ista vitia abduci se patiuntur, depræhenderet: tum profecto necessum erat, ut istam legem severe promulgando, repetitisque vicibus animis nostris instillando, corruptæ nostræ naturæ consuleret, ne in istius generis impietatem delaberemur, atque ita à vera pietatis cultusque divini via deflectentes & summo impetu in vitiorum Syrtes scopulosque irrumpentes, æternum periremus.

Quemadmodum igitur bina illa vitia cognatione quasi aliqua inter se connexa tantopere in rebus divinis & ob frequentiam & ob mortalitatem quasi eorum detestata & prohibita fuerunt: Sic optandum esset, ut eadem doctrinæ in aliis *artibus scientiisque* non solum ab earum Magistris & quasi Præsidibus discentium animis instillarentur, sed etiam ab ipsis cultoribus omni studio atque cura observarentur, quo eo felicius detrimenta, quæ larga copia ab iis profluunt, averfarentur.

Ac ne quis hæc ita dici forte miretur, imo jure in dubium vocanda esse existimet, quæ modo de Superstitione in artibus scientiisque pœne omnibus culta protulimus: producemus quænam in medium, quæ assertionem reddant illustriorem. Neque vero in aliarum scientiarum messem, quam superstitionibus satis largam esse nullus dubito, manum meam im-

mittam, maxime cum nostra in *arte Medica* seges non minus fertilis sit, imo etiam ob ubertatem improbum admodum constantemque laborem requirat, quem ego quidem vix aggredi audeo, nedum exsuperare confido, præcipue cum multorum doctorum assidua diligentia vix voti sui fuerit reddita compos. Nihil enim dicam de superstitiosis phantasmatibus, quæ in cerebello *Anatomicorum* gignuntur, cum in suis theatris omnibus poene in corpore humano oberrantibus vaporibus & atomis singulares suos tribuunt ductulos, capsulas, receptacula &c. imo de illarum subtilis inventionis laude tanquam pro aris & focis depugnant; & quæ sunt ejus farinæ alia: attamen, quum ad rem, ad observationes medicas, ventum est, tum nulli visuntur meatuli, nullis tum ductibus opus est, tum natura sibi perquam facile canales fabricare potest, & viam commodam præparare; tum non erubescunt, probe etiam re considerata, pronunciare, sanguine à sinu priore rupto in ventriculos cerebri profluere & hinc per os cribri-forme in nares & fauces prorumpere, item empyemata thoracis vomicasque hepatis per vomitum, alvum & urinam excerni, & quæ alia miracula sunt, quæ ab artificiosissimo ipsorum Archeo profisciscuntur. Nihil dicam de statuis Idololatricis, quas in *Physiologicis* erectas videmus, dum unus ad Archei pedes supplex devolvatur, alter non binis tantum, sed pluribus regibus & dominis microcosmicis inserviat & obtemperet, alius à glandula Cartesiana imperium expectet, alius ignem sacrum cordis vitalem adoret, alius balsamo vitæ animum obliniat, alius rotulas sculpat & fabricet, & quæ sunt ejus generis alia Numina Physiologica, quæ à Neotericis adorantur. Quid dicam de Superstitione in *Pathologicis*? Hæc sane longe crassissima deprehenditur non tam apud Veteres, qui, uti Viri doctissimi & prudentissimi, nil nisi quod ad solidam artem Medicam pertineat, inquirere sollicitè studebant, theoreticarum subtilitatum incurii erant: quam recentiores, qui in inveniendis fabulosis superstitiosis ejusmodi Phantasmatibus longe feliciores sunt, dum quicquid forsitan per insomnia occurrit, & in sensoriis ipsorum tornatum circum volvitur, illud pro firmo Pathologiæ fundamento, pro criterio veritatum omnium examinandarum, pro lapide lydio, pro infallibili hypothese, ad quam omnia phænomena omnesque circumstantiæ necessario referri debent, (quæ non possunt, aut omittuntur tacite, aut ultra intellectum humanum esse excusantur) in medium projiciunt & universo foro Medico obtrudunt. Nolo hic recensere αἰσιολογίαν ipsorum ætheream, æream, chymicam fermentativam, effervescentem, acidam, alcalinam &c. quibus multorum libri abunde scatent. Exempli saltem loco poterunt esse Febres, quarum doctrina

Strina opinionum schismatibus superstitiosisque naniis penitus fere obruta est, ita ut apud Veteres multos nil nisi intemperies calidi innati, per peregrinum adventitiumque oppressi, humidi radicalis subjugatio &c. apud recentiores vero fermentationes actuales, fermenta sylvestria, peregrinum ætherem in se continentia, spumescentiæ, turgescentiæ, calor à flammula vitali auctius pabulum nactus, aut à sylvestribus spiritibus, aut à poris sanguinis obstructis excitatus, & quæ alia plura ejus modi commenta audiuntur. Quanta itaque in Pathologicis adhuc dum à recentioribus colantur Idola, quilibet non ex paucis hisce tantum, sed ex plurimis aliis facile percipere potest. Unde etiam aperte deprehendi potest ex tali pathologia *therapiam* & praxin pariter monstrosam prodire, de quibus si pauca saltim dicere vellem, longissimum foret. Sicut in *Chirurgicis* magna talis modi phantasmatum seges est, nec ibi desunt particulæ fulcatæ, acuminatæ cuspidatæ, hamosæ, ramosæ, aut alio modo figuratæ, item salino alcalinæ volatiles, acidæ, arsenicales & aliæ, quæ in diversitate humorum per discrimen solidarum explicandum, commoranda supponuntur & inferuntur. Quæ vero quantaque in *Chymicis* alitur superstitio? Quanta ibi idola venerantur nostrates in pharmacis eorum universalibus famigeratissimis, præstantissimis, præsentissimis, efficacissimis, penetrantissimis, Morbos pertinacissimos sævissimosque egregie domantibus, divinis cæloque delapsis, & quæ alia superlativa hyperbole stipatis? Hæc vero tanta & tanta remedia, si ad experientiæ rationisque calculum revocentur, si medio die lucerna etiam Diogenis quærantur, disparent, ne umbella quidem remanet, & ita ægri & ægotantes Medici falluntur, qui ne positivum virium superlativarum Theoreticarum gradum in Praxi consequuntur.

Quod postremum superstitionis genus præ superioribus improbandum & detestandum mihi videtur, cum multa gravissima damna & mala sæpe lethalia inde resultent. Neque vero innuo solum his verbis Empiricorum superstitiones circa medicamentorum suorum efficaciam conspicuas, quæ longe maximæ sunt; sed l. maxime illorum hic tango, qui magni chymiatři & à se ipsis & ab aliis putantur, quique rem non acu solum, quod dici solet, sed mentis acumine se tetigisse arbitrantur, dum contra maxime rebelles humani corporis morbos è fonte Chymico potentissimas panacæas (titulotenus tantum ita insignatas) depromunt, easque magno hiato multisque ostentationibus aliis etiam objiciunt, qui ipsi creduli avide & ambabus manibus umbram Junonis amplectuntur. Quantis enim laudibus; quantis encomiis therapevticis in lucem olim proditæ sunt magnæ panacææ metallicæ solares, lunares joviales &c. specifica, antihectica, antifebrilia, bezoardica &c. quæ si promissis responderent, fane nullus Morbus ita sæ-

vus foret, quin ille non facili negotio his cuneis possit supprimi? Quam vero tecte antea, & ne fraus illico pateret, ænigmatibus, hyeroglyphicis figuris &c. obtegebantur & involvebantur? Quam ardentissimo desiderio quæritabantur imo emebantur? Ast Parturiunt montes, nascitur ridiculus mus. Quod si enim, ut antea dixi, paullulum ad lydium experientia, ne dicam rationis, lapidem examinentur: tum certe omnes illæ panaceæ evanescunt, & deprehenditur, quam grandi & Inventores illorum & Affeclæ & admiratores errore, fuerint decepti & ad huc dum decipiantur.

Sed plura de his, quæ postremo dixi, de insigni videlicet hac *Chymiatrorum superstitionis* specie in medium proferre apud animum statui, & id efficere contendam, ut principio τὸ ἐν assertioni meæ adstruatur, recensendo & examinando illas panaceas, quæ ansam superstitionibus talibus præbent. Postea etiam τὸ διότι causasque hujus superstitionis quasi geneseos scrutabor. Ac denique detrimenta, quæ exinde propullulant, ostendam.

Antequam autem hoc fiat, & ad rem ipsam accedam, benignissimum. Numen supplici prece veneror, ut pro sua divina clementia atque bonitate hoc institutum in sui nominis gloriam feliciter evenire jubeat.

Primum itaque, missis illis, quæ ad superstitionis tum in genere tum in specie Medicæ significationis explicationem Philologicam & Philosophicam forsitan pertinere videbuntur, missis, inquam, illis statim ad primum membrum accedamus, & producamus illa medicamenta compositionesque Chymico pharmaceuticas, quæ dictam innuunt atque inducunt suppositionem. Occurrit itaque nobis *regnum* primum *minerale*, ubi composita & præparata varia in nostram veniunt considerationem. Simplicitas enim speculationis potius Physicæ & Chymicæ sunt quam nostræ Medicæ.

Composita si intueamur, observantur tria eorum genera; unum terrarum diversarum; alterum lapidum; postremum metallorum; quorum multa, maxime vero ex iisdem producta & educta in usum Medicum trahuntur.

De *terrīs* varii generis medicinalibus nihil hic dicam, licet amplissimus pateret campus. Nam longum nimis foret, si eorum, qui communiter adscribitur, usum imaginarium, antipestilentialem, alexipharmacum, cardiacum &c. secundum seriem perstringere susciperem. Notum enim est accuratioribus Practicis, quam non solum non præstent atque exserant illas vires alexipharmacas, proprie & stricte ita dictas, sed quam magna detrimenta in morbis acutis malignis corpori inferant, qui & lethali sæpe eventu fuere edocti, quanta cura & studio illa eximia alexipharmaca tum

tem-

temporis sint fugienda , cum neque alexipharmaco scopo satis faciunt , neque diaphoreticum finem consequuntur , sed contrarium plane ob adstrictoriam stipticamque quasi potentiam edunt effectum. Experimentum hujus rei, nimirum adstrictoriæ, quondam inscius harum rerum feci in proprio corpore, dum alterius laudatione & suasu famosum quendam pulverem alexipharmacum ex terris variis conflatum assumerem, regimine etiam sudorifero admodum valido, quod operationem adjuvare dictitant, imperato: Unde non solum, plurimis licet stragulis obrutus & in fervore hypocausti constitutus fuerim, nequicquam sudoris prolicere potui, sed illius loco tumores œdemotosos, qui totum habebant corpus, contraxi. Atque hinc, ubi ex aliis multis, certi reddimur non solum efficaciam istarum terrarum adstrictoriæ, sed etiam docemur, quam pessimi eventus sit usus earum alexipharmacus, & etiam diaphoreticus. Perversa enim prorsus ratio ac methodus est ad sudores eliciendos, ad diapnæ blandæ habitum corporis disponendum, in usum vocare adstringentia & regimen simul calidum adhibere: Unde in febribus acutis hujus generis pulverum, uti & illorum, qui ex vegetabilibus proprie sic dictis alexipharmacis conficiuntur, usus non solum effectum speratum suum non sortitur, sed & ipsas febres in alios graviores morbos F. lentam, hæcticam, tumores hydropicos, arefcentias viscerum &c. transmutat. Ergo videmus, quam vana admodum & periculi plena hæc de terrarum virtute antepestilentiali superstitio sit, ut illa, quæ amplius de viribus earum specificis tradidere, silentio hic prætermittam. Neque vero medicamenta ex illis producta, ut magisteria, essentia &c. præstantiores vires cardiacas foveant, dum neque has compositiones vis principiorum deserit, quæ ceteras specificas virtutes, si quæ adhuc laterent, & etiam alexipharmacas facile opprimit, efficitque, ut minus tuto iis in morbis acutis malignis fidere liceat.

Alterum mineralium genus sunt *lapides* & nobiliores & ignobiliores, quorum magnus numerus in therapiam superstitiose receptus est. Multa enim & magna satis de virtutibus illorum universalibus, amuleticis, magneticis, astralibus veteres prodidere, qui Cœlum ipsum proprietates suas specificas in illos transfudisse sibi persuasum habebant: Atque hinc, prout lumine perfectiore actionem cœli conceperunt, eo majores promere effectus, nec deglutitos modo, sed gestatos etiam cœlicas suas potentias in corpus humanum exserere, præsentaneamque contra pestem, venena & quoscunque Morbos pertinaciores opem ferre credebant. Hæc vero, uti & alia ejusmodi commenta, quantum ab experientiæ rationisque via declinent: & is facile in ea considerans deprehendet, & ab aliis sæpius ad nauseam usque est demonstratum, ut id negotium jam in me suscipere min-

nime opus sit. Paucis saltem hic loci notari poterit insignis illa superstitio, quam veteres in animo circa *corallia* earumque *tincturas* varias alebant, quamque recentiorum multi adhuc foveant. Hinc simplicibus coralliis vires egregias in deliriis quibus vis, epilepticis convulsionibus, malignis, hystericis, dysentericis affectibus adscripserunt, imo etiam si tincturam ex illis extrahi posset, illum auro pot. æquiparandam esse quoad vires existimarunt. Ut igitur Sulphur coralliorum, quod rubicundo colore ea imbueret, intime recluderent & extraherent, relictis ramentis albicantibus, absque ulla tamen menstrui corrosivitate, ut, inquam, hac ratione tincturam ex iis elicerent varia quæsiere menstrua ex saccharo, melle, pane, manna, oleis destillatis, quorum ope quintam coralliorum essentiam, tincturam nempe rubicundissimam impetrarent. Sed cum posterius colorem rubicundum non tam à *φλογισμῷ* coralliorum, sed vel maxime à menstrui oleositate & aciditate originem suam ducere animadverterent: cepit magna illorum spes de summa Medicina suscepta labascere. Non tamen desistunt subinde circa coralliorum *ἀνάλυσιν* instituere experimenta. Nonnulli tincturas rejiciunt & malunt nudam solutionem à subtili activo, naturæ non adeo adverso, menstruo factam. Qua de causa in affectibus nervorum, epilepsia, magni habent solutionem factam cum spiritu nitri d. Sed merito hic dubitandum, an nudum menstruum non solum easdem vires possideat; sed etiam præstantiores, cum solutio illa ob adstrictoriam potentiam, ab acido nitri & terra corallina leniter styptica oriundam, merito suspecta videatur, nec tota illa in dysenteriis uti liceat. Pariter nec ratione nec experientia convinci poterit, quod solutiones ceteræ cum Spir. tart. formicarum, lignorum factæ quoad virtutes antiscorbuticas, diaphoreticas &c. præferendæ sint simplicibus eorum menstruis, imo etiam dubitandum, an non potius horum efficaciam infringant, quam augeant. Idcirco ex his videmus, neque à Veterum tinctura corallorum, Sulphuris extractione, neque recentiorum nuda & simplici solutione tantum pharmacum sperari posse, quantum ipsi promittebant, & quanta superstitio notetur, in lapidum nobilium æque ac ignobilium viribus definitis. Prout vero coralliis lenem tonicam cum absorbente energia conjunctam efficaciam experientia tribuit: ita reliquis lapidosi in medicinam introductis concretis, maxime vero sic dictis *nobilibus*, hyacintho &c. experientia concedit similem usum tonicum in sudoribus, diarrhæis, hæmorrhagiis, maxime hæcticorum moderandis proficuum. At archealem sedationem, in turbis vitalibus eminentem, ut Archeus in iis veluti in speculo gemæ delectatus, uti exprimunt, confusionis suæ obliviscatur, non nisi in lusu comico admittere valeo.

In quantum vero quasi fastigium evecta sit Chymiatorum superstitio circa *metallica*, unicuique facile patefcet, qui eadem libero animo & accuratiore mentis indagine ſcrutari, contemplari, atque experientia rationis-que criterio examinare velit. Ex infinito itaque illorum numero ea recenſebo, quæ hodie adhuc famoſa & multi uſus ſunt, & quid illis ſuperſtitioſi ſubſit, videbo.

Primum itaque *aurum* omnium metallorum nobiliſſimum communi-ter cenſetur, ſive ob perfectiorem ejus mixturam, ſive ob pretium civile, ſive ob majorem influentiam ſolis, ſive aliam ob cauſam. Qua de cauſa cum in rebus civilibus & communi vita tantum ejus uſum viderent chymiatrī: ceperunt etiam illud in uſum medicum vocare, tam in ſubſtantia, quam in eſſentia ſ. tinctura, quæ auri pharmaca ob excellentes plane virtutes alexipharmacas confortantes &c. quos ab eis ſperabant, ingentis apud nonnullos erant admirationis, & hodie adhuc multi ſummo cultu iſtud idolum aureum venerantur.

Simplicem auri in *globulis* uſum Königius in r. m. magnæ & tantæ quidem efficaciam eſſe in melancholicis & hypochondriacis dictitat, ut & magna eorum pars ab acido hypochondriacorum fuerit conſumpta & feliciffimus etiam effectus inſecutus. Aſt vero de veritate hujus experientia non imèrito dubitandum eſt, cum minime pateat, qua ratione aurum, penetrantiam ſpirituum corroſivorum multorum reſpuens, ab acido melancholicorum, multis viſciditatibus involuto, & tam diu ſine noxa in primis viis latitante, potuerit corrodi, cum potius illud acidum prius in ventriculi ſubſtantiam, quam in auri corpus duriffimum, vim ſuam exerere potuiſſet. *Solutionem* auri idem Königius & alii extollunt ad plures deploratos plane affectus debellandos, ſiquidem ſulphur auri blandum a menſtruo ventriculi extractum ſpiritus animales inſtar radiorum ſolis fovere & ferociam ſalium acrium domare putant. Deducit hanc operandi rationem Kön. ab anomalia menſtrui ventriculi, humorum, & ſpir. animalium cum ipſo menſtruo auri, cum quo humores corporis noſtri corroſivi & depravati conjuncti auri corpori ſeſe applicent, partesque corporis animalis deferant. Sed ſane corroſivitas illa ſpirituum, mechanica extractio ſulphuris auri, anomalia menſtrui auri acidi & cetera ſuppoſita cum valde ſint ſuſpecta; mirum non eſt, ſi & ipſum hæſitet aſſertum. Cum ita ab hac ſimplici & rudi ſaltim magnæ iſtius panacea uſu & adhibendi methodo nullum chymiatrī deprehenderent effectum: tum, ne ſpes omnis pereat, ſubtiliorem viam excogitare ceperunt, qua firmiſſimum auri corpus deſtruerent, quin- tamque ex illo eſſentiam extraherent.

Qua de cauſa non veteres ſolum ad menſtrui appropriati & ad id opus

idonei inventionem omnem movere lapidem : sed multi adhuc inter neotericos spagyricos admodum solliciti sunt, quo menstruum aptum acquirerent, & tandem aliquando votorum suorum compotes redderentur. Multi hodiernorum Becherum aliosque Philosophos Chymicos sequuntur, qui ad verum aurum potabile & quintam essentiam in metallurgicis & in medicis utilissimam acquirendam rem magnesia auri rubicunda seu Sulphure & Mercurio aggredi debere præcipiunt : Igitur sese rectæ viæ insistere arbitrantur, dum crasso plane modo Philosophorum illorum Chymicorum sensum & mentem intelligentes, sulphur & mercurium com. vocant in subsidium. Ubi vero quantum illi à via deflectant, facile ille, qui chymicum sensum percipit, depræhendet. Notum enim est magnum illud Chymix lumen Beccherum tres terras diversi generis pro materialibus metallorum principiis firmiter asserere, quæ sunt salino liquidosa seu vitrescens, sulphureo pinguis, & metallico mercurialis. Harum primam vitrescibilem, quæ maximam metallorum partem constituit, & matrix veluti est reliquarum, in omni fere terrea substantia latitare, etiam in acido universali abundare, existimat; alteram differentiam coloris, saporis &c. metallis suppeditare, & in omni inflammabili, & sale etiam nitri quærendam esse, maxime vero in sulphure, cui laxiore & facilius resolubili compage adhæreat; Tertiam vero mercurialem specificam determinationem in metallicam densitatem & ductilitatem corporibus ipsis metallicis conciliare, & maxime in argento vivo, & Sale comuni (quod experimentum de marte artificiali confirmat) esse reperibilem. Ex his itaque, si propius ad mentem Beccheri accedimus, manibus sane palpari potest, quantopere illi in sua quinta essentia auri aberrant. Quod si enim in nulla re amplius difficultas restaret, quam in nuda mixtione crassiorum illorum corporum eaque tantum simplici; (uti existimant) tum certe crederem, ipsos etiam constantius aliquid, quam quærunt, esse consecuturos, dum non solum æquor rubineo colore imbutum sint conspecturi, sed etiam cygnum, aurea corona ad litora evolantem depræhensuri. Ast vero an hunc finem, quem ipsi illi Chymici adspirant, crasso suo & rudi plane modo attingere possint : merito dubito, licet ipsi, inani voluptate capti, veram se auri quintam essentiam nactos esse profiteantur & glorientur. Subtiliora enim illa sunt, quam ut ad tales duræ cervicis homines, ut ait Beccherus, pervenire queant. Quod si enim paulo emunctioris nasi essent, & fundamentum suarum operationum aliquali saltem studio & cogitatione inquirerent : tum sane intellecturos & depræhensuros esse confido, quam præstantius auri potabile tale & sine magna difficultate & labore ex carbonibus elicere queant, ut adeo minime opus sit, illa pretiosa aliisque usibus aptiora ingredientia deperdere, simulque

sum-

sumtuum & diuturnorum laborum facere jacturam. Rem ut exemplo illustrem, do duplicem casum, unum quo aurum pro sui reseratione cum cinabari, uti mixto ex mercurio & sulphure, diu cœmentatur, & mixtum hoc postea cum alcali fustum a spiritu vini extrahi posse creditur: alterum, quo aurum cum hepate sulphuris vel antimonii, ut vitulus aureus, comburitur, & sulphuris hujus lac cum spiritu vini extrahitur, posteaquam prius abstractione ol. vini in resinofam solubilitatem fuerit redactum. Ibi tincturam alcalinam; hic vinosam prodire in aprico est. Noscitur in his alius error, quem pariter in Magistrorum, quos sequuntur, præceptorum per-versa interpretatione & intellectu cōmittunt, dum ad mentem veterum Chymicorum pro menstruo solari spir. v. com. adhibent. Veteres enim, uti ipse Paracelsus, per essentiam vini, alcool vini, vinum essentificatum, & quo alio modo illud menstruum nuncupent, minime intelligunt ardentem spir. v. sed potius vinum, in spiritum acidum concentratum ac permutatum, quod in figendo, volatilizando sulphure metallorum peculiarem virtutem sortitur, de qua Paracelsus, Isaacus Hollandus, Viganus plura celebrant. Sit vero ita, concedatur, largiatur, affirmetur, aurum in liquorem irreducibilem esse resolutum, ipsosque artistas veram auri essentiam esse consecutos, cum hoc illis luce meridiana clarius appareat; Sit inquam ita; Quid tum? Qua enim ratione inde simul inferri poterit, ipsos simul panaceam divinam, quæ agonizantes e mortis faucibus eripiat, esse adeptos? Nondum enim ab ipsis ejus patronis attentis observationibus accuratisque experimentis demonstrari potuit maxime ille imensus, incredibilis, inexhaustus, infinitus, præsentissimus, & quæ alia sunt elogia, in morbis quibuscunque desperatissimis effectus. Neque vero hac deficiente experientia rationes solidiores magnique ponderis adduci queunt, quæ Chymiatros istos ita pertinaciter idolo tali aureo agglutinent. Quid enim quæso auri nobilitas, pretium & charitas, perfectior mixtio ratione ceterorum metallorum, soliditas, difficillima destructio, influxus astrorum specificus &c. Quid, inquam hæc & similia alia facient aut conferent ad virtutem medicamentosam? Nihil sane video. Neque enim sulphur auri, etiamsi extrahi posset, stupendas illas vires exserere posse depræhendo, cum *φλογιστόν* illud, quod auro inhæret, magis universale sit, omnibus metallis multisque aliis corporibus cōmune, uti superius notavi. At vero an illud unice tantas vires præstet, non possum non ire inficias. At vero inqvunt, se summa cum admiratione vires ejus analepticas observasse? Credo sane, si liquor, quem menstrui loco adhibere solebant, confortantibus eximiis, aromatibus, ol. cinamomi, ambra, moscho &c. fuerit conditus, aut in se ipsis experimenta fecerint, aut iis subjectis propinatus, quæ

vel sacra tenet fames, vel quæ ad phantasticas tales impressiones animique imaginationes ab empirio disposita sunt, ubi incorrupti auri nitor & splendor plus sæpe præstare valet. At vero an ita experientia faciendæ & hauriendæ? An ita observationes curativæ notandæ? Mihi sane non videtur. Sed cetera, quæ hac de re amplius dici possent, prætereo. Par ratione in alia medicamenta metallica diaph. auri, mercurium diaph. aur. Bez. aur. &c. magnam fiduciam positam esse videmus. Quoad *mercurium diaph. aur.* haud inficias ibo, eum bonum & efficax esse remedium in obstructionibus aperiendis & aliis etiam affectibus, ubi medicamenta mercurialia solent indicari. Ast vero an a pauxillo auri, cum quo commaritus est mercurius, virtutes ipsi adscriptas, mutuatur, neque per experientiam liquet, neque ex rationibus Physico Chymicis deduci potest. Si quidem per illam patet, quod non solum ab eo præstantior efficacia expectari possit, sed simplex etiam mercurius sine additione auri idem plane præstet, id quod Chymiatæ Ludovicus testatur. Inferunt quidem hic Neotericorum multi ad usum auri in mercur. diaph. adstruendum & evincendum, dum existimant, mercurii corpus per se alias exhibitum nimium virulentum drasticum esse remedium, quod spasmus in partibus nervosis excitet, salivationes nimias, lympham potentissime coagulata resolvens, producat, atque ita nonnunquam sævissima mala progeneret: Hanc vero vim drasticam optime per aurum cicurari, mitigari, infringi posse, & ita feliciter illa subsequutura alias incommoda averti. Regero autem, si metuas minusque tutum existimes, usum mercurii præcipitati a. sublimati, aut alia encheirisi parati, quid opus est perditione auri cum securior via propiorque proficiat in mercur. d. aut aliis medicamentis mercurialibus? Aut cur non minuitur dosis? Sane enim res se non alio modo habere mihi videtur, ac si quis pro scopo leniter salivante, vel cathartico stimulante merc. subl. adhibere velit, ne vero ille noceat, eum æquali aut dupla portione auri reddere leniorem. Causam nullam sciunt, neque ipse reperio nisi hanc, quia sumptuosum forsitan est experimentum Chymicum. Ita delirant nostri reges, ægri vero plectuntur. Præterea magnas quoque vires Chymicos tribuere *Bez. auri*, nomen solum indicare potest. Illud enim pro vero remedio alexipharmaco in morbis malignis, imo in omni morbo repentino præstantissimo habetur, ut illius vires bezoardicæ omnibus aliis alexipharmacis vegetabilibus & animalibus jure præferri mereantur. Hic vero ipsos Chymiatros errare depræhendimus, cum consideramus ipsius medicamenti præparationem, quoniam non solum nihil de auri substantia participet (quippe quod neque ab acido nitri dissolvi, & in cal-

calcem, uti reg. antimonii, redigi potest, neque aurum etiam connubium inire solet reguli antimonii) & tum nihil aliud sit quam bezoard. min. hoc vero idem ac antim. diaph. verum etiam quam perverso plane modo bezoardici nomen efficaciaque affingatur. Licet enim sudores ad scr. Sem. vel per se, vel cum aliis datus egregie moveat, quod & præstat simplex mercur. diaph. minime tamen alexipharmaci καὶ ἐξοχὴν sic dicti titulum in morbis malignis petechialibus tuetur. Præstat itaque hic, uti & in pluribus aliis medicamentis auri, auro parcere, & potius, juxta sententiam B. Ludovici, ex medicamentis aurum quam contra ex auro medicamenta concinnare.

Et hæc quidem de auro metallorum sole. Oboritur alterum sidus *luna*, quæ inter Chymiatros insignis superstitionis præbuit ansam. Veteres enim huic metallo præsentissimos effectus antepilepticos, apoplecticos, magnos in omnibus capitis cerebrique affectibus, ob analogiam, quam inter ipsam lunam & cerebrum intercedere putabant, adscribere. Igitur multum illi solliciti semper fuerant, ut in commodam medicamenti formam redigerent. Apud neotericos licet crassior illa superstitio de analogia lunari exulare videatur: nihil ominis tamen minime negligentiores sunt, cum pariter omnem animi intendunt nervum, ut aptas efficacesque medicinas lun. potab. bezoart. lun. &c. exsculpere & fabricare queant. In illo acquirendo multi eam viam, quam antiquiores jam premebant, omnium facillimam esse putant, eique etiam insistent, dum ex *luna tincturas* mediante spir. vini, spir. urinoso vol. acuato, non aliter ac tincturam Ven. extrahunt. Imo eo magis læti de felici experimenti successu sibi gratulantur, cum se tincturam genuinam cœrulei pulcherrimi coloris consecutos esse vident. Tribuunt ei magnum usum in paralyti, epilepsia, apoplexia, febribus malignis, omnis generis deliriis, quasi illa ferociam salium in M. S. amplexu suo peculiariter soleat invertere, fibrillas cerebri roborare & ad decentem motum spiritus, quos ob menstruum urinosum ab acido liberat, uti loquuntur, deducere. Quam parum vero horum votis respondeat effectus: testatur experientia, quæ nullum aut levem ab hac tinctura lunari, uti & ab aliis lunaribus pharmacis, promittit effectum. Neque vero illa modo dicta lunaris tinctura hoc titulo inscribi meretur, cum ne momentum quidem de lunæ substantia a menstruo fuerit solutum & omnis adhibita ad præparationem ex lunari calcere reduci queat. Num itaque ab hac veneris solum solutione supra memorati effectus cephalici expectari possint, non facile quispiam harum rerum gnarus affirmabit, cum potius vomitus, nausea, cardialgia, & alia incommoda observentur, qui perversi venerei effectus in multis drasticas operationes & hinc confusaneas abstractiones ar-

chei a furoribus suis epilepticis in nonnullis subjectis relinquit, indeque per indirectum utilem, sed morbo sæpe periculosiorem, exitum nanciscitur. De *bezoart. lunari* eadem sententia ferenda est, quæ superius de Bez. auri lata est. Pari enim cum hoc passu ambulat. Neque enim quicquam de lunæ substantia, quæ neutiquam vel ab acido nitri arroditur vel in consortium cum reg. antimonii abit, in sinu continet, neque etiam ullos effectus proprie bezoarticos, seu alexipharmacos præstat. Ergo neque hæc panacea lunaris inscriptionis titulo digna est, & melius etiam esse cense-rem, si hoc metallum crumenis potius, quam destillatoriiis includeretur, Ludovico ita judicante.

Considerationi medicamentorum lunarium subijcimus *jovialia*, quibus ingentes virtutes, quæ nihil tamen nisi superstitionem sapiunt, a Chymiatris assertas esse videmus. Unde etiam hodiernum & in pharmacopoliis & in Medicorum laboratoriis varias ex illo metallo paratas panaceas, specifica, polychresta &c. depræhendere licet, a quibus magnum solamen & infallibile auxilium & remedium in hæcticis, phthisi, morbis malignis, febribus intermittentibus, pleuritide, passionibus hysteris, colicis sibi promittunt. Argumenta, quæ ipsos in hanc opinionem adduxere, varia depræhenduntur. Primum deducunt ab influenza joviali in hoc metallum, dum ipsum jovem omnes suas virtutes & proprietates majore cum potentia, quam ceteros planetas in productione & generatione hujus metalli, emittere opinantur, uti existimat Faber in secretis chym. Alterum quærent in analogia hujus metalli cum humido radicali; siquidem idem Faber asserit, jovem humidum radicale admodum homogeneous possidere nostroque simile; unde facillime ejus vires & vigorem restituat. Aliud afferunt ab ejus mixtura; quam ratione reliquorum concretorum metallicorum temperatissimam pronunciat Basil. Valent. Tr. von natürlichen und übernatürlichen Dingen / ut neque nimis calidum sit, neque nimis frigidum, siccum, humidum, sed ex his omnibus qualitatibus mediam possideat. Et ideo conclusionem ad ipsas vires idem auctor transfert, daß keine Kranckheit vorfallen kan / da Jupiter ein Verderben bringen könnte / wann seine Urßney nicht überflüssig im Gewicht gebraucht wird; Cum potius salutaria ex eo proveniant medicamenta. Aliæ, quæ insuper ad stabiliendam assertionem producuntur rationes, more physico chymico sunt, & depromuntur partim a substantia ejus particulari inflammabili, partim mercuriali, partim terrea. Qui a portione joviali inflammabili operationis vires deducunt, dicunt, eam e medicamentis jovialibus menstruo acido extrahi, vitriolaceam naturam induere & ita in ejus generis evadere concretum, quod crassos viscidos humores incidat, imo etiam volatilitatem bilis ejusque acrimo-

momim figat & enervet, leni adstrictione ebullitionem humorum sistat, atque ita calori p. n. medeatur. Qui vero a parte subtili mercuriali virtutes jovialium hauriunt, anomaliam hujus mercurii cum mercurio com. metallico, maximarum in medicina virum, proferunt. Qui denique a terrea portione argumentationem formant, illi quidem a viribus terrarum absorbentibus incrassantibus, adstringentibus, tonum partium fibrosarum nimis relaxatum & labefactatum roborantibus &c. ad majores virtutes antihecticas, phthisicas, alexipharmacas ratiocinantur. Hæ itaque & aliæ a Jovialibus Chymiatri adducuntur rationes, quibus superstitionem hac in re conceptam firmare conantur. Sed nulla earum tanti ponderis & momenti est in solida experientia & ratione, ut laudes infinitas, quas jovialibus tribuunt, possit tueri. Quod enim in primo & secundo argumento de proprietatibus & virtutibus jovialibus stanno comunicatis, deque anomalia humidi radicalis jovialis cum eo, quod est in nostro corpore, afferunt, fabulam potius sapit, quam rationem aliquam probabilem Chymico Medicam, quæ etiam jamdudum ut veterum aliquale figmentum est explosa. De temperie vero principiorum, joviale mixtum constituentium, eorumque æquali mixtura & hinc profluente blanda temperata efficacia, quæ adducit Basil. Valent. illa tum contra experientiam & rationem Chymico Physicam sunt, tum quòque, etiamsi ipsum argumentum firmo staret talo, nihil inde considerationi Therapeuticae accederet. Quod si enim elementa jovis expendamus: facile Basilio assentiri poterimus, stannum, præter principium ejus terreum salinum (quod reliquorum matrix est) & φλογισόν, ex mercur. non ita copioso, si respectus ad plumbi mixtum habeatur, constare, nec eo ita volatili impuro & incocto; non tamen fixo penitus, uti loquuntur, ut cum perfectioribus metallis comparari queat, cum non solum c. sale am. nitro, antimonio sublimari queat, sed & solum & cum antimonii regulo mixtum in auras abeat. Nequaquam igitur ea principiorum jovis temperata mixtura est, quæ in aliis mixtis metallicis, quæ perfecta vocantur, observatur. Imo si esset, non patet, quid exinde utilitatis medicæ redundaret. Quibus omnibus crucem quasi figit, quod stannum in mixtione sua metallica naturali & totali minime aut raro in usum medicum vocetur, sed si in calce prius fuerit redactum, ubi tamen & alterum principium φλογισόν & tertium mercuriale (in quo tamen nervus argumenti ponitur, utpote a quo metalli ipsius vires pendeant) deficit, quod patet, cum per se nunquam iterum in metallicum concretum redigi queat, ut & in aliis corporibus metallicis observatur, si iis quocunque modo duo illa principia, a quibus metalleitas dependet, sunt sublata. Ex his facile colligi poterit, quænam solutio futura sit extremi argumenti, quod

quod superius attulimus, de specifica quasi & singulari principiorum jovialia operatione. Quicunque enim a portione stanni sulphurea vires deducunt, illi seipso decipiunt, dum illas in calce jovialia exusta quærunt, quam tamen omni inflammabili substantia exutam & destitutam esse modo innuimus. Ergo nec illud assertum firmo innitur fundamento, cum ratio operandi jovialium medicaminum, a vitriolica earum indole (quam propter sulphuream ejus partem cum acido ventriculi induunt) deducta, minus apte cohærere depræhendatur, siquidem, præter absentiam sulphuris, principiis Chymicis contrariari videatur spir. acidum c. sulph. vitriolescere, ut illud suppositum de acido ventriculi prætermittam. Idem sentiendum est de illis, qui in parte essentiali mercuriali vires & effectus prædictos jovialium scrutari & expiscari satagunt, cum non solum *ἀδύνατον* sit felicem pro voto successum invenire, imo vero absurdum plane in calce, in terra, illud metalli elementum, quod specificam determinationem in metallicam compagem, mollitiem, ductilitatem &c. largitur, sollicite quæritare. Tandem qui in tertio stanni principio, seu potius primo physico, subsistunt, & ab illo vires jovialium laudatas derivant, pariter errare videntur, cum a potentia & efficacia calcium jovialium absorbendi, incraassandi, adstringendi minime sequi possit, & actu sequatur effectus specificus antihecticus, antiphthificus, antipestilentialis &c. cum & eadem qualitates & aliis terrarum generibus sint communes, a quibus tamen pariter minime præstantes illi effectus expectari vel possunt vel debent. Quamobrem neutiquam, in genere saltem chymico medice de joviali natura differendo, ullo modo panacealis illa stanni universalisque efficacia confirmari potest. Quod si vero ad speciales rivulos, qui ex illo fonte dimanant, descendamus, singulaque ex illo producta medicamina perlustremus: tum sane nullus dubito, quin parem in quolibet imaginariam superstitionem notare queamus. Ita si famosum specificum *antihæcticum Poterii*, Medici Bononiensis, non solum Chymice consideremus, sed etiam, quod maximum est, Medico Practicæ virtutes ejus adscititias per experientiam attentasque observationes exploremus: tum sane non solum concepta spe inani decipiemur, sed etiam intelligemus, quanta quanta illi homines phantasia fuerint correpti, eaque multi adhuc, qui eam panaceam admirantur, detineantur. Paratur hoc specificum, uti tradidit ipse auctor atque inventor P. Poterius, ex p. 2. jovis & p. 1. antimonii, quæ mixta simul coqvuntur in aqua sua hermaphroditica, seu, ut alibi ait, ex stella signata regis, cui benigna jovis præsentia adveniens balneas maris medio puro naturæ, paravit. Quæ descriptio cum nonnullis obscura quodammodo visa fuerit: Etnerus, magnus experimentorum & inventorum

Poterii admirator, arcanum revelare descriptionemque clariorem studuit reddere in manibus Poterianis, qn. reg. ex antimonii p. 2. & martis p. 1. stanni per ceram purgati p. 2. mixtas, liqvatione confusas, cum p. 3. nitri, quod aquam hermaphroditicam autor nominat calcinare & a falsedine liberare jubet. Et hæc est descriptio magni illius specifici Poteriani, quod multis suspiriis, jamdudum exoptatum nec ab omnibus adhuc impetratum nuncupat idem Etnerus. Quapropter magnam apud eos, qui sine Poterii medicamentis ægros suos curare desperant, gratiam se promeriturum esse sibi persuadebat, maxime quia divinum hæcticis phthificisque auxilium id esse arbitrabatur. Verum enim vero qvicquid de imensa ejus virtute in morbis hepatis, pulmonum, uteri &c. pertinacissimis, maxime vero in phthisi, hæctica, febribus omnibus intermittentibus, & continuis, malignis, ad M. S. turbatam restituendam, temperandis humoribus falsis acribus scorbuticis &c. qvicquid, inquam, de præstantia hujus remedii in his & aliis morbis gloriantur: ibi sane potius prudentium & attentorum Medicorum sententiam amplector, qui divinas illas calcis stannæ virtutes, non per experientiam probatas, sed ab imaginatione profectas, rejiciunt. Consentire hic videtur Lemerus in curs. chym. ubi quæ in genere de jovialibus differit & judicat, non incommode huic calcis jovialis speciei applicari possunt. Ita enim inquit: *Tribuunt stanno virtutes adversus morbos hepatis & uteri. Sed imaginaria est hæc qvalitas, qvam nullo modo comprobatur experientia.* Item Schröderus, *Famosum, inquit, est remedium, sed expectationi sæpe insufficiens.* Accedit his sententia celeb. Ludo. V. in pharmacologia sua, ubi de diaphoreticis mineralibus agit, expressa. Si, inquit, *famoso nunc nonnullibi antihectico titulum per indirectum acquisitum demimus, in reali diaphoretica sua destinatione superiorem hunc nostrum habebimus.* Loquitur autem de diaph. joviali, cujus præparationem ibidem, uti & in ANC. descriptam sudorifero maximo Fabri substituit. Neque tamen hunc pulverem, licet præstantior sit, ita hyperbolice diaphoreticum esse ibidem asserit. Cum vero & experientia desit & ratio nulla inveniri possit, quæ ipsis tale quidpiam persuadere possit: non possum non mirari, quomodo Chymiatrī nostri in illam superstitionem fuerint delapsi. Est enim specificum illud antihecticum nihil aliud, quam calx, s. terra stanni cum admixta portione calcis antimonii connupta. Terram vero illam per rationes Chymico Physicas ita específicos in phthisi, hæctica, malignis &c. effectus edere certe non liquet, cum quoad generales has & universales ejus operationes (de his enim nunc potissimum est sermo) multæ aliæ cum



ipsa illa convenient. Uti igitur neque ab his ob effectus absorbendi, incrassandi, adstringendi, specifica ejusmodi eaque præstantissima expectari potest, sic neque ab illa jovis terra illud jure quasi deposci potest. Quid quod & operationem antimonii diaph. cui admixta est, impedire doceat experientia, imo & ratio subindicare videatur? Cum enim ad diaphoresin excitandam non solum requiratur humorum ad motum aptitudo, sed & pororum tonus in laxitate debita constitutus, tum apparet terram illam vi sua incrassandi & subadstringendi utrique illi medio, quo ad diapnoen opus est, contrariari. Unde multi hodie antihecticum, uti vocant, album præferunt cœrulescenti, quod ipsis, licet rationem negligant, experientia hoc suadeat. Ratio vero hæc esse videtur. Album enim nil nisi ant. diaph. cui paucum saltem calcis jovialis v. g. 4. l. 5ta pars pro consuetudine est admixta. Cœrulescens vero genuinum est antihecticum, seu pura fere calx jovis, quæ quartam vel sextam saltem antimonii partem in sese continet. Et hæc quidem de famoso illo specifico antihectico, cui sane (unice adhibito nec cum præstantioribus potius complicato, aut quod vel maxime hic, uti in omnibus aliis ejusmodi præparationibus, excipi debet, præscripta a Pot. parandi methodus vera est, nec alia ratio componendi, aliaque ingredientia familiaria fuerint, ut more Chymicorum aliter scribere aliter sentire consueverit ipse autor) tantam efficaciam tribuendam esse, eoque deploratos omnino ægros convaluisset minime persuaderi possum, maxime cum celeberrimorum Medicorum sententiæ hic assensum præbere depræhendantur. Taceo, quod fides chymica & medica jamdum apud omnes famulos, tonsores, aniculas sit inter mortua pro hoc specifico.

Prodit ex specifico hoc antihectico alia panacea eaque sine dubio adhuc præstantiorum virium, quod denominatio ejusdem indicare videtur. Dicitur enim cōmuniter & in specie à supra jam laudato inventorum Poterianorum admiratore Etnero, *magisterium specifici antihectici*, quod eliquore, paratum specificum edulcorante, per præcipitationem cum aliquo acido factam acquiritur, non aliter ac nix illa antim. s. famosa Crügeri materia perlata paratur. Rejicit eqvidem idem *Etnerus* hunc modum per præcipitationem illud magisterium conficiendi, & præfert huic non sine ratione, quam tamen non attendit, evaporationem ejusdem liqvoris leni igne institutam. Ubi sane non tam magist. illud in paucissima quantitate remanet, sed omne sal nitri, quod antimonium & stannum in calcem verterat, leviter ab acido sulphuris antimonii alteratum, & quasi in sal vitriolicum neutrum, uti arcano dupl. tart. vitr. lap. prunell. nitro antimonii &c. par cōmutatum. Etsi vero hoc ita dictum magisterium, paucissimam de antihectico portionem contineat, quæ tamen nec melioris notæ est, nec ab ipso

ipso fonte discrepat : tamen non inficior sal illud ejusmodi virtutis esse, quæ majore jure antihectici titulum mereatur, dum ob vires illius obster-
sivos aperientes, refrigerantes, diureticas &c. in omni calore p. n. in
alvo adstricta, imo etiam nimis laxa, diarrhoea, dysenteria, febribus, &
etiam hecticâ atque phthisi, qn. in fieri sunt, satis laudabiles edit effectus.
Itaque quo jure hoc sal magisterium jovialis antihectici dicatur, nullam
nisi forsitan superstitiosam depræhendo rationem. Ita quæ ex eodem ma-
gisterio Tinctura aurantii coloris extrahitur, non est quinta essentia, uti
idem opinatur Etnerus, stanni, sed Tinct. ant. qualis non solum ex scoriis
reguli ant. extrahitur, sed vel maxime ejusdem omnino coloris & saporis
elicitur ex scoriis succineis quasi in depuratione reg. c. nitro facta relictis :
Ex quibus uti tinctura elegans, acris efficaxque, quam alii tinctura me-
tallorum nominant, elicitur : ita ejusdem generis tinctura ex illo sale me-
dio, quod sulph. ant. in calcinatione absorbsit, per spir. ardentem elici
potest. Unde non modo inanem Chymiatrorum superstitionem, sed
etiam non levem ignorantiam & Chymicam & Medicam haurire & co-
gnoscere licet. Hactenus de specificis Antihecticis.

Reliquæ, quæ adhuc in recensitione supersunt, panaceæ joviales,
comode hic præteriri possent, maxime cum levioribus saltem circumstan-
tiis, non tam Medicis quam Chymicis circa præparationes occurrentibus
discrepent. Nihilominus tamen pauca adhuc de illis subjiciemus.

Quid igitur de *sudorifero* illo famoso *maximo* nomine inscripto ?
Argumenta, quibus motus est *Faber*, ut tantis virtutibus illud decoraret,
superius jam vidimus. Vulgo illud parant ex reg. ant. joviali crebrius
& repetitis vicibus igne leni sublimato. Meliorem descriptionem, quam
est ipsa auctoris, tradidit *Ludovicus* & in pharmacia sua, & etiam in
A. N. C. Etsi autem hac ratione medicamentum ex stanno diapnoicum
nanciscamur, quod etiam ipsius Fabri sudorifero præferendum esse faten-
dum sit : minime tamen propterea ita hyperbolice diaphoreticum idem
celeb. Ludovici judicat. Mitius de prædicto sudorifero Fabri sentit
Ettmüllerus, qui non maximum quidem, attamen satis magnum esse
censet. Et credo sane illud effectum suum diaphoreticum edere, præfer-
tim, si paulo in largiore dosi & cum sufficiente regimine sudorifero adhi-
beatur : Ubi vero & ipso medicamine neglecto eundem effectum insecu-
turum esse minime despero. Quod vero tantum sudoriferum prædice-
tur, quod in minima mole efficacissimum sit, quodque hinc alios præstantes
usus post se trahat : per experientiam sane nec ipse Ludovicus, nec alii
adhuc dum cognoscere potuerunt; imo etiam in medio adhuc relinqui-
tur,

tur, an comune diaph. jovial. ex reg. jovis c. nitro citra multas ambages confectum, minores, nec ant. diaph. majores & præsentiores præstet effectus.


Neque vero discrepantiam aliquam quoad effectus observare possumus *Bezoardicorum jovialium* Mynsichti, Hartmanni &c. multo minus causam pervestigando penetrare, quo infelici fato bezoardici munus cum nomine ipsis fuerit collatum. Quantum enim alexipharmicarum virium proprie ita dictarum præstent hæcce bez. testari poterit experientia, ubi in malignis nunquam sane eadem neque adeo conspicua diaphoretica notantur, ut adeo neque diaphoretici nomen tueantur, neque à com. diaphoretico joviali uti quoad præparationis fundamentum, sic neque quoad ipsum effectum differant.

Ex paucis itaque hisce, quæ modo adduximus, clare apparere videtur, non levem esse illam superstitionis speciem, qua multi Chymiatři circa jovialium medicamentorum usum fuerant correpti, quaque adhuc multorum animi tenentur, qui a magistrorum præceptis ne latum unguem recedere volunt, sed potius omnem animi intendunt nervum, ne sacra illa religio evertatur aut levem patiatur ecclipsin. Hæc itaque de jovialibus. Nam fumus hic jovialis in cœlo medico disparere incipit, nec superstitioni tempus amplius est, cum plebi alia experientia nota sit, quod terrea talia hecticis magis noceant, obstructions viscerum augendo, abstersiones ulcero-
sas impediendo. Recte ita dehortatur *Stablius*, si colliquationes hecticas accelerare & mortem adjuvare quis velit, tum antihectica talia, imo tinctura Grammanniana, fideliter adhibeantur.

Progrediamur ad *martialia*, ubi pariter superstitiones notabimus. Profecto enim, nisi eadem illa Chym. virtus & hic quoque observaretur, & locum haberet, infinitæ illæ martialium præparationes, vexationes &c. non prostant. Quæcunque enim virtutes in multis illis præparatis quærantur: illæ sane in simplici limatura martis, aut si productum aliquod & præparatum Chymicum exoptes in diaph. martiali Ludoviciano, vel, si in forma liquida desideres, in tinctura aliqua martiali vitriolica abunde haberi possunt, ut adeo tantorum laborum & ambagum ad varias martialia, essentias, crocos, bezoardica, acquirenda minime esset opus. Imo etiam testatur experientia, consentiente *Sydenhamio*, nudam martis substantiam assumptam non solum non nocere, uti arbitrantur, sed etiam felicius & breviori temporis spatio curationem absolvere, quam si illa quovis modo fuerit ad usum Medicum adaptata. Uti enim in aliis melioris notæ remediis, ita & hic illud præstitit Chymicorum officiosa sedulitas,

non

non tantum ut *δρασινολεγα* non sint, sed etiam a perversa planeque inutili eorundem diligentia & opera plusquam otiosa magis evilescant. Refert etiam idem celebr. *Sydenh. Diss. ep. de aff. hyst.* mineram martis crudam, prout e terræ visceribus eruitur, multo efficacius in morbis subjugandis operari, quam ferrum, quod igne jam perustum & fusione depuratum est. Illud certum est, nullum remedium præclarum atque *ἐξαιρέτων* uspiam gentium fuisse procusum, quod non a natura præcipuas vires jam acceperit. Quare *Θεῶν χεῖρας*, non vero hominum, præcellentiora quævis medicamina antiquitas grata piaque compellavit. Quod vero nativa quidpiam bonitate atque efficacia præstans mirandos edat effectus, quacunque demum forma ingeratur, multa sane in praxi Medica occurrunt, quæ ejus rei nobis possunt facere fidem. Neque enim in medicamentis præparandis medica cernitur peritia; sed in illis seligendis appropriandisque, quæ natura suo igne elaborata liberali sua manu porrigit. Illud tantum agendum nobis restat, ut medicamenta in eam formam reducamus, qua vel eorundem substantia, vel saltem vis & efficacia melius corporibus nostris impertiri queat, cui muneri obeundo facultates nacti sumus plusquam pares. Quocirca hæc ipsa circa martialia medicamenta maxime notari merentur, ubi certe superstitiosa curiositas est, nimium sollicitum esse atque anxium, ut sexcentas ejusmodi variationes inquiramus & ad usum medicum comparemus, præsertim cum omnes fere illæ compositiones, nisi forte vel menstruo, vel ab adjecto alio, seu minerali, seu vegetabili, levem aliquam mutationem induant, quætamen a generali martis efficacia non omnimode recedit, in fine & effectu conveniant, sibi que invicem respondeant. Quæ enim vulgariter de viribus & effectum martialium, crasin & qualitatem humorum alterante & corrigente, sang. edulcorante, sulphur sanguinis figente, humores crassos incidente & attenuante, bilis volatilitatem corrigente & quasi coagulante &c. afferunt: illa inquam falsa sunt, neque experientiæ respondent. Sed potius ea gaudent qualitate, quæ motum alterat, & qua (tonum partium solidarum adstrictione vel leviori vel fortiori pro individuorum diversitate augendo, vasaque excretoria stimulando, atque ita transpressione humorum per partes solidas porosas aucta modum intendendo) per accidens humores crassos viscidos pituitosos incidunt & attenuant. Comprobari hoc potest & à priori & à posteriori. A priori si illud quæramus, tum sane sapor austerus, ponticus, stypticus martialium nil nisi eundem in corpore hum. adstringentem & tonum partium roborantem effectum promittere potest. A posteriori vero pulsus citatior, color faciei rubicundior, vomitus, alvi adstrictio, appetitus prostratus, & alii dubii, incerti, sæpeque contrarii



effectus martialium subindicare manifesto videntur vim eorum adstringentem, tonum partium augescentem & ideo motum sanguinis promoventem. Testabitur hoc eo magis effectus eorum in hypochondriacis scorbuticis &c. dum ibidem ab eorum usu, imprimis si subiecta non adeo robustæ, validæ, sed tenerioris constitutionis fuerint, ibi, inquam, observare licet anxietates, dolores, tormina, spasmodicas contractiones, & alia symptomata, quæ ab illorum usu, maxime præpostero, ingravescent & fuscitantur. Unde aperte liquet, quicquid martis virtus in hypochondriacis & suffarctu venæ portæ confiniumque viscerum præstat: illud non tam aperiendo & alterando humores, quam leniter constringendo efficere. In hoc fine omnes martialium præparationes conspirant, nec illæ (quarum quidem efficacia proprie corpori & substantiæ martiali debetur) ulla ratione, nisi majore vel minore adstrictionis gradu differunt. Unde, sive mitius & lenissime adstringens remedium martiale desideres, sive fortius & validius exoptes: tum utrumque in una præparatione diaphoretici martialis Ludoviciani, seu croci martialis antimonialis haberi potest. Illud enim in elutriatione ipsius antimonii martialis cach. facile a crassiore substantia, quæ sponte ab illa secedit, & fundum petit, ut supernatans, separari potest. Hoc vero erit ipsa hæc crassior terrestris & adstringens magis substantia, quæ vel igne adhuc semel tractari vel ita saltim, prout libuerit, in usum vocari potest. Ex quibus facile depræhendere possumus eorum errorem, qui neglecta tali ἐγχείρησι, diversas quasi illas martis partes non separant, sed in unum acervum cōmīscēt, & ideo non modo ancipitem martialium effectum, sed utpl. noxium & periculosum experiuntur, maxime vero in hypochondriacis, aliisque, qui tenerioris & sensibilibioris texturæ corporis sunt. Unde non modo dubias & incertas martialium vires pronunciant, sed omnem etiam illorum usum, utut magnus ab aliis habeatur, damnant. Nam profecto nisi crassior illa pars a subtiliore rite separetur: tum medicamentum evadit, quod non solum sensu valde adstringens percipitur, sed etiam summe constringentes in corpore exserit vires. Unde præparata eundem usum & vires non aliter ac corticem peruvianum præmissis præmittendis generalioribus exerere, ac motiones febrium intermittentium sistere & suppressere observatur. Contra vero subtilior ejusdem pars hoc non ita efficaciter & celeriter præstat, & tutius in debilibioribus & habitus corp. sensibilibioribus hominibus adhiberi potest. Ergo videmus, omnem martialium, ut talium, effectum non modo non humores alterare, sed motum saltem, fibras motrices constringendo, corrigere, neque a prædicto operandi modo ceterorum differre, ut adeo infinitorum illorum martialium vexationes, bezoarticorum variorum præpara-

parationem nulla suadeat necessitas, neque utilitas magna jubeat, sed undique superstitio in hoc capite theoretica & practica evanescat.

Diximus ita breviter, quid de infinitis illis martis præparationibus judicari possit. Restabunt in examine nostro remediorum metallicorum duo adhuc metalla plumbum & cuprum, quæ perquam comode à nobis præteriri possunt, cum pauca ex illis arte Chymica producantur, quæ in usum medicum, internum maxime, trahi possunt, imo etiam, si exhibeantur, eos effectus præstant, quæ facile usum plenarium dissuadere queant. Ita testatur experientia saturnina, uti balsama saturni, ejus saccharum &c. non modo nullum ejusmodi hyperbolicum usum ac vires, maxime vero antiphthicas, uti vulgo putatur, præstare, verum etiam obsumas noxas & detrimenta, quæ corpori inferant, omni studio vitanda, nec intra corpus facile adhibenda esse. Id quod & veterum etiam & recentiorum observationes passim testantur. Ex antiquioribus præter *Dioscoridem* notavit illud etiam *Fernelius*, dum ægrum à saturni pulveris adversus arthritidem usu dysenteria crudeli, & postea, ea cessante, sævissimis ventris rosionibus & torsionibus cum contumacissima ventris adstrictione, virium debilitate, appetitu dejecto, ictero & aliis malis fuisse correptum notabat. A recentioribus multis idem confirmatur. Sic legitur apud *Rhodium* in obs. à Sacchari sat. usu paralyfin & contracturam, qui communis effectus est, ortam. Idem de Sacch. saturni usu testatur *Borellus* in observ. dum ægrum, illo ad tempus aliquod usum, paralyticum evasisse meminit. Rigebant, inquit, membra ejus, & tanquam congelatus & apoplecticus erat. Sed quid opus est, aliorum observationes ad hujus rei veritatem adstruendam adducere, cum illa res satis nota & manifesta sit. Imo quotidiana multa exempla nos edocent, quantum saturnina ad contracturas & paralyfin tribuant, & quanta alia mala corpori inducant. Videmus hoc in figulis, qui in fictilibus lithargyrio incrustandis occupati sunt, præsertim vero si ollis calidis agglutinare debent lithargyrium: (Si enim ollæ frigida ob argillæ bonitatem lithargyrium admittunt: non tantas noxas percipiunt.) Hi enim incidunt exinde in vehementissimos intestinorum dolores cum præcordiorum & spirandi difficultate, membrorum tremore, contractura, articulorum debilitate, summa virium diminutione, alvi pertinacissima adstrictione & aliis sævis symptomatibus. Eadem & sæviora symptomata à saturni fumis deglutitis & Sacchari saturni saporem referentibus experiuntur metallicolæ; Corripiuntur enim torminibus ventris summe convulsivis, intolerabili intestinorum cruciatu, qui ægrum rabiosæ felis circumgyrationem æmulari cogat, unde morbus Germanis audit *Die Hüften Rage*. Neque enim standi sæpe ulla da-

datur potestas, inquieti huc illucque moventur, terram repunt, eam ungibus rodunt: accedunt his sudor frigidus, lipothymia, cardialgia, vomitus, febres lentæ, urinæ suppressiones & tandem convulsiones musculorum, contracturæ & paralyfes partium extremarum. Ex his itaque clare apparet, finem & effectus saturninorum, quocunque etiam modo vitalia penetrent, sive per medicamenti formam, sive in vaporibus cum aere corpori ingerantur, esse paralyfin, convulsiones & contracturas, atrophias, ariduras, cachexias &c. Plumbum enim ob gravem ejus mercurialem substantiam intimius intunicarum nervearum & musculorum poros penetrando, obstructions efficit, fibras nerveas lancinat, irritat, rodit, atque ita sævos spasmos producit, cui causæ alia multa symptomata dolores, vomitus, cardialgia, anxietas, excretionum naturalium suppressiones, intestinorum inflammationes debent suam originem. Eadem illæ particulæ saturninæ, quando vasa lactea & sanguifera angustissima & cutis etiam poros obstruunt: Tum atrophix, ariduræ partium, cachexia &c. subnascuntur. Si vero cum succo lymphatico ad nervos, tendines, ligamenta deferantur, facile in angustissimis tubulis hærent, obstructions pariunt, spir. animalium interceptiones producant, atque ita paralyfes & contracturas prognerant. Unde facile cognoscere poterimus detrimenta, quæ à saturninorum usu interno in corp. hum. redundant, quæ tanta sunt, ut nos merito ab eorum usu avocare queant, nec superstitiosum laborem injungant, in plumbi cicuratione multum esse sollicitum, cum vel Italica artificia in pulvere successivo ex cerussa formando, vel vinorum acidorum per lithargyrium mitigationes exitiosæ notæ sint, & indicent, in vitalem usum ex hoc metallo nil salutaris sperari posse. Quod vero usum saturninorum externum Chyrurgicum attinet: sane multa etiam ibidem offeruntur, quæ nos abducant. In inflammationibus enim grandioribus, ubi ob virtutem refrigerantem ita dictam communiter adhibere solent, non modo nil, aut rarissime, juvant, sed scirrhum lividum post se relinqvunt tumorem, qui, si ab aliis medicamentis nulla sequatur discursio, evadit ulcerosus, erodens, cancroides. Si vero nihilominus tunc quoque succedat suppuratio, in ambitu ad minimum peioris moris ulcerationem efficiunt, & sinuosis ulceribus viam sternunt. Quod emergit ex illa superstitione, ac si saturninorum materiam quandam specialem in se contineat, fermentum acre corrosivum, cancrum coagulans invertendi. Quibus tamen minime usus saturninorum ob vires leviter temperantes in inflammationibus minus profundis, circa eorum confinia applicando, magis vero in ulcerosis superficialibus ardoribus, maxime in sanguineis calidioribus subjectis proficius rejicitur.

Lustratis ita paululum saturninis, restant, uti paulo antea dixi, *Venerea*, quæ agmen mineralium claudunt. Cum vero ex venereis quæ prodeunt præparata, ob nauseabundam eorum suffocativam similemque adversam-qualitatem ipsis perpetuo adhærentem, internis usibus ex specialiori effectu majoreque præ aliis fructu adaptari nequeant: tum hic neque Chymiatorum solertiam tanta spe uti in ceteris ad panaceas consequendas illectam quasi esse, neque adeo ipsos circa illa, quæ ex venereis igne chymico prodirent, vana superstitione correptos reperimus. Non tamen hic defunt, quæ in nostram considerationem possunt venire. Ita videmus, quantæ virtutes diaphoreticæ aperitivæ in morbis chronicis præstantissimæ, uti & in affectibus maniacis epilepticis efficacissimæ fuerint adscriptæ *bez. Veneris* grysei coloris & ejusdem cum ceterorum bezoardicorum præparationis. Arbitrantur enim corpus mercurii reguli antimonii sulphur veneris imbibere, corrigere, atque vim emeticam in diaphoreticam convertere. Docet tamen experientia & ipsi etiam sensus, neque hoc venereum medicamentum nauseabundam & suffocativam suam vim, uti modo in genere de venereis diximus, deposuisse, imo vero adhuc dum effectum suum in nausea, vomitu, cardialgia circa constrictione &c. provocanda largiter exserere. Neque vero ratio illa Chymica de sulphuris veneri per corpus mercuriale correctione locum hic habere videtur, cum *φλογισόν* illud, quo substantia metalli veneri imbuta est, in calce veneris desit, utpote in cujus præsentia vel absentia specificam differentiam metallicæ ductilis substantiæ ab ipsa calce ejus positam esse puto, neque vero, si ad esset adhuc, ita manifestum foret, an ab illo vis emetica potissimum sit deducenda, cum alias exinde colligi posset, effectum emeticum in antimonio crudo longe majorem ac præsentio rem esse, quam in regulo ant. (in hoc enim longe minor quantitas sulphuris est, quam in illo) quod tamen falsum. Ergo cum *bez. hoc veneris* adhuc vim vomitoriam, a principio suo mutuam, possidere pateat: i. e. tali virtute, quæ tonum ventriculi non modo augeat & roboret, sed spasmus & constrictionem, quæ ad expulsionem materiæ in ventriculo contentæ opus est, ipsi visceri inducat: corrueat reliqua virtus adscititia diaphoretica aperitiva &c. utpote media ad finem tendentia & directæ fini plane contrariantur. Ad diapnoen enim excitandam & humores tenues mobiles subtiles reddi debent, & ipse tonus cutis ceterarumque partium solidarum relaxari, quo comode transpiratio & exhalatio humorum serosorum fieri queat. At vero remedium, à quo talia speramus & expectamus, poros cutis obstruit & occludit, tonum partium fibrosarum constringit & coarctat, ut ventilatio & evaporatio seri excrementitii impediatur, illudque potius copiose ad centrum ha-

bitus corporis reprimatur. Patet itaque ab hoc bez. veneris minime felicem aliquem effectum diaphoreticum, multo minus alexipharmacum expectari posse.

De ceteris, quæ ex venere in usum Medicum internum educuntur, nil præterea afferam, cum ejusdem propemodum conditionis, usus & census esse possint. Sic enim *ens Veneris* magnam spem multis quidem excitaſſe, uti *sulphur vitrioli anodynum*, at non impleviſſe palam eſt, ut usuale reddere superfluum fuerit agnitum.

Quæ vero in *usum externum* ex cupro parata trahuntur: talis potius generis sunt, quæ magis apud Chirurgos quam apud Medicos in vanum superstitioſum & peſſimi sæpe eventus abufum ducta obſervantur. Hujusmodi maxime ſunt viride æris, ung. ægypt. Fuscum F. Wurzii & alia venerea, quæ in omnibus ulceribus, fistularum generibus non ſolum ad calum duriffimum brevi tempore abſumendum, ſed etiam ad acidum ulceris corroſivum, uti loquuntur Muys aliique, abſumendum, ſine discrimine habito ratione partis affectæ adhibent, & ad ea ſolummodo veluti ad ſacram anchoram confugiunt. At vero frequenter docemur, ſi ulcera fiſtuloſa ſeu ſinuofa, quæ ad oſſa, membranas, glandulaſque tendunt indiſcriminatim, per talia ſeptica venerea præſcripta & vulgari ipſorum methodo tractentur: tum non modo ulceris illius conſolidationem plenariamque curationem impediri, verum etiam cariei oſſium, membranarum glandularumve inſigniorum arroſioni & hinc variis incommodis reſultantibus occaſionem præberi. Retardatur inquam ulceris conſolidatio, quando ulcera ad partes oſſeas attingunt, atque ita ſeptica ejusmodi applicata ad eaſdem penetrant, arrodunt, atque cariem inducunt. Hac vero præſente, nec ante omnia ad reſtitutionem perducta, fruſtra erit omnis ulcere adhibita medicatio. Imo etiam ſi per baſſamicorum uſum ad conſolidationem vergere videatur: brevi tamen certiſſimeque eum majore incommodo ulcerosa eruptio recrudeſcit. Unde apparet a tali carioſa oſſis, vel ſubſtrati, vel quocunque modo communicantis, corruptione nequaquam felicem ulceris conſolidationem expectandam eſſe, neque hanc ob cauſam præcipue in talismodi ulceribus & fiſtulis corroſiva illa tantam utilitatem, uti putant, fœnerari. Quod ſi vero cum ulcere eadem illa ſeptica ad membranoso nervoſas partes pertingant: tum non raro, niſi mature ſuccurratur, convulſiones, inſtaſmationes ſævaque ſymptomata producunt. Ita haud ita pridem tales effectus in puero notavi, qui fiſtuloſo ulcere genæ laborans & a Chirurgo viridi æris ſoluto frequentius tractatus, tandem poſt ſummos dolores, (quos ſub tali applicatione percipiebat) & cariem oſſis, convulſionibus, delirio & aliis ſymptomatibus correptus obiit. Paria, imo pejora,
ad-

adhuc incommoda observantur in navi maternis, si ejusmodi corrosivis tractentur. Cum enim illa, extraordinario & intento prorsus studio per-texta corpora, (præcipue majora & capaciora corpora si sint) multis & insignibus nervis prædita sint, ut durius tractata admodum sensibilia observentur: tum sane longe magis a profundiore ejusmodi læsione repentinæ & violentæ inflammationes oriri possunt, quæ etiam multo promptius, quam aliæ, etiamsi insigniores & diffusiores sint, in gangrænam & sphacelum prolabi observantur. Unde utique septica talia non solum gravibus inflammationis symptomatibus, sed etiam spasmodicis & convulsivis motionibus, imo virium dejectionibus, mentis vacillationibus & febrilibus anomalis turbis ansam præbent. Ex quibus, uti & ex aliis, ubi inconsiderate cuprea illa septica adhibentur, colligitur, quantam noxam illa corpori adferant, si ad illorum methodum universalem quasi adhibeantur. Minime tamen hisce omnem eorum usum rejiciendum esse putamus, maxime si non solum cum circumspeditione adhibeantur, sed præcipue si consistentiæ partium solidarum læsarum ratio habeatur. Unde utique, si hæc, uti & aliæ, cautelæ & circumstantiæ observentur in ulceribus callosis mundificandis, absumendo callum, suum habent usum, uti & in fungis tenerioribus spongiosis & aliis etiam affectibus Chirurgicis. Illorum saltem hic tangere libuit opinionem, quia illa cuprea specifica quasi, nec manifesta adeo, ratione non tam ad callum rodendo absumendum, quam ad acidum corrosivum, quippe quod foetida illa depascentia, eliquescentia, manantia, crustosa, sinuosa & omnis generis ulcera producat, absorbendum operari arbitrantur. Ubi sane juxta ipsorum sententiam, si genesis ulcerum illorum a tali acido corrosivo pendeat, illa venerea rodentia in nullo ulcerum genere bonum aliquem effectum edere possent, siquidem ratio ipsa dictitet, corrosivi vim ab alterius corrosivi accessione non tam infringi aut labefactari, quam potius augeri. Ex quibus etiam simul cognosci potest gravissimus ille error circa usum arsenici aliorumque causticorum ad cancerum enecandum, uti vulgo loquuntur, adhibendorum pronatum. Stolidus enim ille usus, ex crassissima plane ignorantia geneseos talium affectuum ortus, uti non nisi pessimo ausu suscipitur, ita tristissimo plane eventu perpetratur: Unde internæ angustiae, anxietates, turbulenti spasmodici motus longe ultra solitum cito increbescunt, & facillime ad tumores, febriles, gangrænones, convulsivas catastrophes datur transitus. Sed de his cancerum enecantibus remediis *εὗς ἐν παρόδῳ* & occasione dementis illius septicorum venereorum ad ulcerum acidum corrosivum imbibendum abusus dictum sufficit. Quemadmodum enim hæc corrosiva arsenicalia cancrum illa ulcera minime tollunt feliciter, neque cancerum, quem vivere

forſitan & corpus perrepere putant, enecant : ita & illa venerea inepta plane ſunt ad corrigendos humores peccantes lymphaticomucidos, lentos, ſeroſos &c. & ad acidum ulcerum corroſivum abſumendum. Sed tranſeant hæc cum univerſa venereorum claſſe : Ubi etiam toti illi diſquiſitioni, & examini illorum Medicamentorum, quæ arte Chymica ex metallis produciuntur, finem imponimus.

Cum itaque ex metallicis ea breviter adduximus & luſtraverimus : quæ ad Idola Chymiatrorum pertinere illorumque ſuperſtitionem ſapere videbantur : ſequitur in ordine noſtro electo, ut ſpecialiter dicta mineralia etiam pauliſper ſub incudem vocemus, &, quæ ex illis producta & in uſum Medicum vocari ſolita ſuperſtitionem quandam innuunt, pariter examinemus.

Sit itaque primum nobis *mercurius*, qui uti fons eſt, ex quo efficacifſimorum remediorem plures rivuli dimanent, ita etiam origo evadit variarum ſuperſtitioſarum opinionum, quas circa ejusdem medicaminum uſum, vires & effectum ali videmus. Hæc vero depræhendemus maxime, ſi præter alia ex eo producta *cinnabarim* vulg. factitiam aſpiciamus, ſententiaſque, quas circa ejus uſum viresque tulere, perpendamus. Ita alii eam venenum ſui generis humano corpori, uti alia venena mineralia, nocentiſſimum pronunciant. Alii non quidem venenum eſſe judicant, uſum tamen ejus medicum damnant, & ad uſum modo Mechanicum, pictoribus aliisque relinquendum eſſe exiſtimant. Alii mitius ſentientes uſum externum ad ſuffimigia unguenta &c. in lue venerea, ſcabie adhibenda probant, neutiquam vero uſum internum, quem nil niſi lethalia damna & miſerandam mortalium cladem comitari poſſe putant, uti *Schulzius* loquitur in *triga cinnabr.* Quæ vero uti & aliæ ejusmodi opiniones, ſive experientia ſive ratione eas perpendas, nullibi ſane ullum aſſenſum inveniunt. Mitto ego primam, utpote jam dudum exploſam, quam *Fernelius*, *Sennertus*, *Schenckius* aliique multi fovebant, quamque ſuis obſervationibus practicis probare nitebantur. Iſte pictorem a ſuſtione penicilli, cinnabari illiti, graviffimis ſymptomatibus, convuſionibus, manuum pedumque contracturis, doloribus acerbiffimis hypochondriorum &c. correptum eſſe tradidit. Ille ſymptomata eadem, quæ a merc. ſubl. aſſumto obſervantur, hujus uſum inſecuta eſſe meminit, imprimis autem roſiones in ventriculo & inteſtinis, vomitum & diarrhœam cruentam, ſpirandi difficultatem, cardialgiam. Hic vero *Schenckius* prodidit a ſolo ejus uſu extrinſeco in ſuffimigiis juvenem, qui ulcus ab impuro coitu in pene contraxerat, ſanato quidem ulcere doloribus capitis graviffimis & hæmorrhagia

gia narium & aliis symptomatibus fuisse correptum, quæ etiam tandem ipsum juvenem extinxere. Verum in omnibus hisce assertionibus veritas & fides historiarum & observationum non tam ratione eventus, finis, quam ratione originis & causæ efficientis in dubium vocatur. Cum enim aliæ multæ causæ subsint, quæ occasionem ejusmodi malis præbere potuerunt: tum sane non injuria suspicio est, an non hic fallacia aliqua a non causa ut causa, uti Philosophi loquuntur, committatur. Alteram qui fovent sententiam, mitius quam priores hi sentire videntur, non tamen multum ab horum recedunt opinione. Si enim damnandus est ejus usus Medicus: tum profecto sequitur necessario, eum aliquid perniciosi corporique hum. infensi in se continere. Ita illam pictorum capsulis aptiorem, quam Medicorum forulis pronunciant. Hanc vero sententiam illi refutant, qui tertiam amplectuntur, dum utique usum cinnabaris externum in empl. suffim: unguentis concedunt. Hærent vero, ubi ad internum ventum est, quem neque approbare volunt, neque ipsi tentare experimentumque facere audent, verentes ne miserandam cladem inferant mortalibus. Unde multi in illos vel pharmacopæos vel Medicos summo impetu invehuntur, qui in præparatione specif. ceph. Mich. aut aliorum pulverum in locum cinnabaris ant. cinnab. vulgarem cum sumis damnis & vitæ etiam periculo conjuncto substituunt. Et *Schulzius in triga cinnabr.* Medicos Præcticos ab ejus usu magnopere dehortatur: *Nolim*, inquit enim, *cuiquam præsertim incipientibus in quævis sæpe incidentibus auctor esse temerarii ejus abusus.* Ergo videmus hinc, quanti timores, meticulositates, trepidationes invaserint Chymiatros, antequam ad cinnab. usum internum accedant. Causas vero supervacanei hujus metus si inquiremus: nulla apparet. Quod si vero quispiam ei usum intra corpus non solum tutum cum felici effectu conjunctum tribuat, verum etiam æqualem plane & eundem, quem cinnab. ant. exserat, adscribat; imo etiam communem quodammodo ipsi cinnab. nat. asserat: eum sane aut riderent & mente captum dicerent, aut ipsi obstupescerent, ut vox faucibus hæreret. Illud vero non modo experientia & observationes accuratiorum Medicorum affirmant, sed etiam ipsæ rationes Chymico Physicæ suadent. Non inficiabor, qui cinnabaris nat. ut & ant. usum viresque præstantes mercuriales in cutaneis affectibus, doloribus pertinacioribus, vitiis phantasie, epilepsia, affectibus capitis & nervorum, humores acidos viscidos in coagulum abeuntes incidentes & alios plures adferant *Wedel.* in pharm. uti & *Ludovici Hoffmannus.* Ast vero an non idem cinnab. vulg. præstet, ne utiquam observatur. Confirmat hanc assertionem observatio *Schulzii*

in tr. de Cinnab. allata, qui tamen longe ab sententia hac alias deflectit. Commemorat ibidem Practicum quendam sibi admodum familiarem, cognitione vero materiæ Medicæ accurata & exquisita leviter saltem tinctum, multoties cinnab. com. pro nativa usum fuisse, inscium tamen ejus rei. Postulaverat enim semper a Mercatore, quem Materialistam vocant, cinnab. simpliciter sine additamento nativæ. Usus itaque ea erat non modo sine omni noxa, sed cum præsentaneo effectû in notoriis affectibus ad gr. IV. Imo, etiam addit, pulverem Mynsichti mirabilem ex eadem confecerat. Ex quibus sane perquam clare æqualitas virium dictorum cinnabr. elucescere potest. Quod si enim tantum discrimen ratione virium eadem intercederet: tum sine dubio illud medicus depræhendisset. Imo novi Medicum Practicum certe prudentissimum & accuratissimum, qui ne quidem cinnab. ant. ob laboriosam satis & sumptuosam præparationem adhibet, aut raro utitur, sed solum cinnab. vulg. Nihil tamen indeneque minoris efficaciam neque peioris etiam experitur. Taceo aliorum plures observationes, quæ idem testantur. Res enim clara evadet, modo quis ipse ejus rei periculum faciat. Certe enim ipsa cinnab. com. æque feliciter effectum suum edit in resolvenda lymphâ viscida tenaci, salivatione excitanda, & aliis affectibus, imo in ipsâ epilepsia, si rite adhibeatur. Proinde sine omni scrupulo ad plures non dicam uncias, sed libras per aliquot annos in diversis aularum pharmacopoliis & præscriptione ordinarii Medici consumsi. Neque vero illud solum a posteriore, seu ab experientia, (quæ cinnab. com. similem c. cinnab. ant. imo & cum cinnab. nat. quæ tamen nonnunquam celerioris efficaciam esse videtur, tribuit effectum) manifestum evadit; verum etiam a priori, seu rationibus & Chymicis & Pharmaceuticis patescere potest. Chymicas si scrutemur & fundamentum utriusque præparationum contemplemur: nulla ibi occurret differentia. Utraque duo agnoscit principia merc. & sulphur. Ille maximam mixti partem constituit; unde & vires ab eo solum fere dependent. Hoc vero in pauca quantitate octava vel 10. parte corpori mercuriali admixtum est, id quod & a priori & a posteriori manifestum evadit. Hæc sunt amborum Cinnabr. principia constitutiva, quæ & antiquiores & recentiores confirmant, imo & eorundem Synthesis & Analysis probat. Quoad principium primum mercuriale non puto differentiam intercedere, cum simplex in utroque lateat mercurius. In Cinnabari enim antimoniali salia corrosiva ex spir. salis concentrato, quo scatet mercur. sublim. antimonii corpus mercuriale deferunt, & antimonium, ceu magis amicum, ob faciliorem solutionem aggrediuntur, illudque leni accedente calore vel humiditate intime solvunt, receptumque ita in porulos liquorem illum glaciale, quem butyr. ant.

nun-

nuncupant, constituunt. Cum itaque a mercurio & sulphure antimonii pars regulina antimonii & ipsum sal acidum, quod mercurium in amplexibus suis tenuerat, recedant & ita purus mercurius relinquatur: nulla cinnabari antimoniali ratione primi istius principii differentia chymica a cinnab. vulg. agnosci potest, quippe quæ, uti notum est, purum mercur. in mixtionem suam recipit, quemadmodum & antimonii cinnabaris purum mercur. & sulphur secedentibus salibus & parte antimonii regulina sortitur. Ergo discrimen aliquod adesse ratione sulphuris necesse est. Illud enim in utraque cinnabari conficienda ramosis suis particulis sese cum corpore mercuriali conjungit, illudque præcedanea sublimatione in fixam stabilem substantiam transmutat. Hanc vero differentiam maxime agnovere Chymiatrī antiquiores, dum sulphur antimonii solaris magis naturæ esse, officinalem vero com. sæpe arsenicalis esse existimarunt. Antiquum hoc commentum ut ut jam dudum sit explosum, minime tamen huic veluti fundamento superstructum ædificium simul eversum est. Quæ enim de indole antimonii sulphuris solari afferunt, partim falsa sunt, cum neque in auri corpore tale sulphureum, quale in antimonio est, hæreat, sed terra solummodo inflammabilis, multis aliis corporibus communis ac pœne universalis, neque etiam vel Synthesis vel analysis antimonii per artem Chymicam instituta illud innuat, cum notum sit, antimonium ex reg. ejus mediante sulphure com. non modo ejusdem qualitatis, ac nativum est, verum etiam purius, & ob id melioris usus reduci, imo etiam sulphur ipsum antimonii si purum sit, neque particulis regulinis inquinatum, notabilem differentiam non indicet, partim etiam si jam esset solaris naturæ, non pateret, quomodo exinde tantorum effectuum proventus dimanare posset, cum illa sulphurea parte seu *φλογισμῷ*, quod auro inest, minime sulphur com. destituatur. Quæ vero postea de sulphuris com. vi arsenicali inferunt: illis contrariatur demonstratio & à priori, cum virulenta arsenici facultas non tam a sulphure, quam a salibus causticis admixtis pendeat, & a posteriore maxime, cum virtus sulphuris balsamica, demulcens, vulneraria &c. minime effectus causticos arsenicales exferat. Quibus omnibus accedit illud maxime argumentum & experimentum, quod etiam valebit ad differentiam cinnabarium ratione sulphuris destruendam, nec adeo prætereundum. Scilicet notissimum est, tam ex præparatione cinnabaris, quam ex ejusdem in sua principia resolutione, quam paucum sulphuris antimonii imixtum sit, ita ut, etiam si parce exputem, ne octava pars ratione mercurii compositionem ingrediatur. Quoad præparationem manifestius illud deprehenditur in cinnabari com. quam antimonii. Ibi enim sextam tantum partem sulphuris ad unam mercurii accipimus. In cinnab. ant. idem si attentius

tius omnia observes & ingredientia antimonium, merc. subl. & prodeuntia butyr. ant. probe ponderas, licet non nihil obscurius, patebit. Quoad resolutionem vero idem pariter notabitur, si vulgare experimentum c. alcali, sulphur absorbente & imbibente, ut ita mercurialis ab ejus connubio liberetur, quispiam instituere velit. Ergo ex his etiam videmus, nihil aut paucum bigam illam cinnabr. respectu sulphuris differre, ut adeo appareat cinnabarim totam fere esse medicamentum mercuriale, a quo consistentiam, texturam & virtutes possideat, quemadmodum rectissime sentit *Exc. Dn. Hoffm. in tr. de cinnabr. antim.* Quocirca cum neque à sulphure neque a mercurio notabilem differentiam in cinnab. ant. (de hac potissimum agitur) videamus: disquiritur non immerito, an nihil aliud, præter dicta principia cinnabarim ant. accedat, quod ipsi præ cinnab. com. tribuat prærogativam. Ita vero si est, aut debet procedere a salibus, aut à corpore antimonii regulino metallico. Qui a salibus corrosivis mercurii subl. illud derivant, asserunt, eadem sulphur antim. exaltare, ac eo quidem modo, quo color rubicundus tincturarum, ex floribus aliisque paratarum, ab accessione acidi evolvitur quasi, & uti loqvuntur, acuitur. Qui vero partem antimonii regulinam inferunt, asserunt, de eo aliquas partes simul cum substantia sulphurea in connubio hujus cum mercurio, ipsi concreto & aggregato cinnabarino admisceri, & ob ejus vim penetrantem potentias simul cinnabaris intendi & augeri. Ego vero in utroque argumento non inficiabor illud fieri posse, nempe accessionem quandam salium & reguli. Quid vero ad confirmationem dubii faciat, non intelligo. In priore enim plane non opus est, ut evolutio & exaltatio sulphuris ab acido expectetur, cum & sulphur jam copiosum suum acidum habeat, & acidum adjectum sulphur & mercur. in cinnab. fixata Clauderi nil præstare ad oculum patet. In posteriori pariter non inficiabor, particulas quasdam regulinas, quas tamen paucissimas esse oportet, in cinnabarinum concretum sese insinuare (licet illud alii forte negent per experimenta synthetica ex ipso regulo probe purificato, sulphure & merc. sublimato aut etiam per sedulam & curiosam ponderationem & ingredientium & productorum, aut etiam per ἀνάλυσιν cinnab. institutam) & tantum forsitan, quantum in sulphure antimonii hædere reguli id antim. diaph. ex eodem c. sale nitroso productum probat. Verum quid tantillum valeat ad virtutes & facultates plane immutandas; neque à priori neque à posteriori perspicere possum. Posset ulterius de postremis hisce contrariis argumentis examen institui, si solummodo adhuc περὶ τῆς δίοσις, seu cur cinnabaris ant. tantam prærogativam ferat præ cinnab. com. quæstio restaret. Cum vero τὸ ὅτι in firmo stet talo: tum omnis talis, quantacunque etiam suscipiatur, speculatio erit frustanea. Lustratis
ita

ita paululum iis argumentis chymicis, quæ ad æqualitatem & differentiam cinnabaris spectare videbantur: restabunt therapevticæ seu potius pharmaceuticæ, ubi pariter nullam cinnabari antimon. palmam adportat. Nolo enim hic sulphuris virtutes balsamicas demulcentes, temperantes, anodynas, pectorales quasi específicas & alias, commemorare, cum, uti paulo superius notavi, utraque cinnabaris parum virium à sulphure mutuetur, contra vero omnes eas corpori mercuriali debeat; Cum vero mercurius in utraque cinnabari præparationem eodem modo ingrediatur, nec metamorphosin laudabilem prius patiatur in quadam earum cinnabrium: tum neque ab eodem ulla differentia effectus, ut re simplici, nec disparem mixtionem subiente, petenda videtur. Ex hisce itaque omnibus clare patefcere puto illa, quæ supra in thesi adduxi, nempe (1) nullum venenum esse cinnabarim com. (2) tutissime non modo in usum Medicum externum, sed & internum trahi posse, nec mechanicum solummodo esse. (3) Palmam dubiam facere ipsi cinnabari antimonii, & huic neutiquam prærogativam deberi. Nam profecto & ipsas vires antepilepticas cinnab. ant. quas veluti específicas multi tantopere extollunt, largiter in cinnab. com. reperimus, modo non solum rite præparetur, sed, quod nervus rei est, legitime, justo tempore, non neglecta generali medicatione & aliis observatis circumstantiis, quæ in usu specificorum notari debent, adhibeatur. Interea tamen minime inficiabor, medentes sæpissime in hac concepta spe & fiducia decipi. Neque enim omni observatione ab illis confirmari poterit, usum ejus semper pro ratione temporis, subjecti &c. rite fuisse administratum. Longior in hac superstitionis specie fui, quam necessarium erat. Progrediendum nunc erit ad cetera mercurialia, ex quibus ea solummodo desumam & brevius expendam, qualis ibi superstitio foveatur. Ejus generis sunt æthiops mineralis, ipsa quodammodo cinnab. ant. panacea Anvvaldina, Panacea ex cinnab. nat. s. arcanum cinnabaris Mætli, electrum min. merc. d. solaris, merc. d. cinnabarinus &c.

Cinnabarim ant. in nostrum censum non trahemus, siquidem illa securum mercuriale est remedium, quod diaphoretica exaltat, motiones spasmodicas epilepticorum, hysteriarum, colicorum, artuum & aliarum nervosarum partium sedat, cutaneos affectus evidenter tollit, phantasæ vitiis, imo sæpe etiam malignis febribus confert, nec non intermittentibus, affectibus pectoris etiam, medetur, & alias præstantissimas vires exserit, quas ita recenset & dilaudat exc. Dn. Hoffm. in tr. de cinnabr. ant. Binas saltem hic præter alias nominare placet superstitiones, quibus illa occasionem suppeditabat, unam Medicam speculativam, alteram Chymicam. Prior est in explicatione modi operandi specifici quasi

in epilepsia, quem ab ejus alcalina indole procedere autumant, uti illud præter alios etiam ab Margravio in coll. chymicis Leidenſibus aſſertum comperimus. Ubi quidem 3. ſuppoſita ſunt, quæ dubium movent. (1) Epilepsiæ cauſam materialem proximam eſſe acidum. (2) Eundem affectum curari per alcalia. (3) Cinnabarim ant. eſſe alcali. Primo horum contradicit tum cauſa vera ex historia morbi accuratiore hauſta, tum etiam ipſius epilepsiæ, infantilis maxime, de qua mentio facta eſt, cura. Cauſalitas enim magis docet eam originem debere materiæ viſcidæ lentæ mucoſæ, tenaci, vel in primis viis, vel in aliis partibus ſeriferis hærente. Unde ad talem mucum e corpore ejiciendum convulſio illa opus eſt. Probant id etiam epilepsiæ cauſæ occasionales, ſiquidem facile eam pro- naſci videmus a cruſta lactea retro pulſa, ſcybalorum induratione &c. quæ tantam comotionem naturæ, & phyſice & moraliter indigent. Pro- batur hoc & eo magis quidem à poſteriori ex curatione ipſius epilepsiæ, quæ abſolvitur humores tenaces fluxiles reddendo per catarrhalia, abſorbentia, temperantia, ſuccinata, myrrhata &c. eos correctos poſtea educendo per purgantia rhab. merc. d. rad. ir. &c. & per diapnoica leniora, & denique motus iſtos epilepticos ſpecificè tollendo per cinnabarina aliaque: Unde intelligi poteſt epilepsiam magis a materia mucida viſcida tenaci, quam ſa- lino acidâ produci. Ex quibus facile hauriri poteſt ſolutio alterius ſuppo- ſiti, de cura epilepsiæ per alcalia. Quod ſi enim epilepsia ab acido prove- nit, tunc ei alcalia debent opponi. Atqui poſterius eſt falſum, uti ex ſupra dictis liquet, E. & prius. Ultimum vero ſuppoſitum certe experimentis non reſpondet, cinnabarim antimonii eſſe naturæ alcalinæ, cum minime affectiones & attributa alcalini ſalis tam eſſentialia quam accidentalia poſ- ſideat & exſerat. Eſſi enim forſitan ab acido corroſivo affuſo ſtrepitum efferveſcentiæ edat: minime tamen ob id alcali dicenda eſt, cum idem effectus etiam ab aliis corporibus metallicis & mineralibus ſubſequatur, quæ tamen neque alcalinæ neque acidæ ſunt naturæ, ſed ſolummodo ille motus procedit ab attenuatione, intima diſiſione, diſcontinuatione corpusculo- rum ſolidorum & hinc ſubſequenti receptione in poros fluidi. Sed mitto ſpeculationes tales theoreticas medicas. Neque enim tales, quarum in- gens farrago eſt, huc referre ad ſcopum noſtrum quadrabit.

Alterum ſuperſtitionis genus, quod hic obſervare licet, eſt varia illa inutilis cinnabaris ant. vexatio & in Q. E. cinnab. panaceas, arcana, cinna- barim ſolarem mutila & manca tranſmutatio, quæ operoſæ perquiſitiones niſi aliud præſtant, quam ut ſumptus laboresque deperdantur, cinnabaris ſua virtute exuatur, & boni experimentatores naſo ſuspendantur ad unco. Riſit jam dudum hos conatus, imo valde deteſtatus eſt Celeb. D. Ludovi- cus.

cus. Si enim inquit post diuturnam affationem aut Spirituum cohobia (uti illud fit in panac. Anvvaldina, quæ per crebriorem spir. vitrioli & spir. vini c. cinnabari ant. incorporationem & exsiccationem perficitur) aliquid præstatur, id usitatorum aliorum diaphoreticorum effectum haud est superius. Id quod vel maxime in prædicta panacea observare licet, cui an spiritus vitrioli eundem titulum jure imponat nescio. Quid vero pulvisculus ille ex cinnabari nat. per edulcorationem cum aqua & exsiccationem cum alcohol vini superaccenso, panacea Moetsii dictus, quid inquam hic præstantius in malignis ipsaque peste præ fonte suo, unde dimanavit, foveat, nihil demonstrat. Certum equidem est, cinnabarina, uti & alia metallica Medicamenta, quo magis sint triturrata & in subtiliorem pollinem redacta, eo expeditiorem in lymphæ coagulo incidendo, sanguinem crassum, viscidum, quasi congrumatum, resolvendo, obstructionibus referendis &c. edere, atque ita optatiorem effectum nancisci. Contra vero si hæc *ενχειρησις* pharmaceutica in trituratione negligatur & grosso saltim modo cinnabaris cominuatur: tum non solum tardior succedit operatio, sed non raro omnis cum fœcibus, quas rubicundo tingit colore, excernitur. Quamquam itaque cominutio accuratior ad facilitandam & promovendam operationem aliquid tribuat, minime tamen ideo medicamentum in panaceam convertit.

Tincturæ vero *volatiles* cinnabaris, seu ejus quintæ essentia cum oleo aliquo aromatico, sale alcalino, spiritu ardente extractæ aut alio anomalo modo paratæ, quæ etiam vina vitæ, essentia solares, spirituales &c. appellantur, quid aliud sunt, quam tincturæ antimoniales sulphuræ? ut taceam infinitas earundem vires in prolongatione vitæ, omnis nocivi e corporis sphaera expulsionem, instaurationem præsentissima virium plane emortuarum, imo vitæ ipsius & partialis & totalis evanescentis revocatione &c. & quæ aliæ laudes imensæ sunt, quæ tamen nil nisi ostentationes auctoris indicant.

Pari ratione *balsamum* illud cinnabarinum in pectoris affectibus specificum ex eadem cinnabari ant. mediantibus oleis aromaticis anisi, menthæ, cort. citri, thereb. &c. dissoluto prius vinculo, quod cinnabarim ant. mercurio alligabat, per aliquod alcali, extractum nihil aliud nobis offert, quam est bals. antimonii, quod ex tincturæ antimonii sicca seu sale illo nitroso sulphurato, quod e scoriis reg. ant. c. oleis notissima *ενχειρησις* elicetur, & non exigui usus tum interni tum externi est, demulcentis, detergentis, consolidantis &c. Imo etiam an non utrique huic balsamo commune illud sulphuris balsamum vel æquiparandum vel præferendum sit, experimentator haud difficulter deprehendet. Quare consultum mihi esse videtur, non ita prodigum esse cinnabaris antimonii, in commodiores usus trahendæ, sed eidem, ut multo labore, industria, sumptibus acquisitæ, paulum parce-

re, cum alia multo faciliore & comodiore via idem illud, quod quærimus, consequi possimus.

Æthiops mineralis a colore ita dictus magnam quoque in admirationem rapuit Chymiatros, ut minime & hic etiam defuerint, hoc inventum superlativis pro more viribus & facultatibus coronare. Inventionis laus nescio an solertiæ scientiæque Chymicorum debeatur, an potius amanuensium incuriæ. Hi enim forsitan mala fortuna cinnabarim vulg. factitantes & vulcani vim intendentes ipsam cinnabarim combustionem deperdiderunt, & tali fortè fato magnam illam panaceam impetrarunt. Ecquid enim aliud est ipse ille æthiops, quam cinnabaris eam dictam μελαμόρφοσεν passa per incautam tractationem? Quis non videt, ejus vires à cinnabari com. non modo æquari sed plane superari, cum ibidem portio sulphurea omnis fere sub vi ignis exhalaret & evolarit, quæ tamen ramositate sua globulos mercuriales involvendo medicamentum illud tutum multarumque virium constituit. Vires præstantiores hunc æthiopem habere, quam omnia mercurialia remedia, Barkh. in pharm. Synopt. tribuit. At qua ex ratione qua experientia. Nulla. Tacet.

Sed ne terminum excedam, & nimius esse videar in examine mercurialium, cetera medicamina panaceasque mercuriales, præteribo. Prudens enim Chymiater, qui nullis, vel auctoritatis, vel speculationum imaginariarum fictarum, vel aliis præ conceptis opinionibus obrutus est, facile quicquid vel in bonam vel in malam partem de iis judicandum sit, perspiciet. Sufficiet coronidis loco hisce addere jam sæpius B. Ludovici sententiam, quam in pharm. sua de mercurialibus in universum ferebat. Ita enim inquit, mercurius vel præcipitatus vel fixatus vel quocunque modo præparatus bonum quidem est remedium diaphoreticum resolvens, mundificans, nec tamen protinus universale. Sane enim multos morbos ne attingit. Verba pauca sunt, sed quæ ad scopum nostrum quadrant.

Nunc ad alteram mineralium speciem, nimirum *antimonium* accedamus, ubi pariter, quæ in considerationem nostram pertinere videbuntur, breviter attingemus. Cum itaque antimonii duæ partes constitutivæ sint, nimirum pars regulina, mercurialis-metallica, & altera sulphurea, atque pro diversitate harum partium varii etiam generis prodeant medicamenta: placet hanc differentiam in ordine dicendorum observare, ac primum ea, quæ è parte regulina producuntur, tum etiam quæ ex sulphurea eliciuntur pharmaca considerare. Sit itaque primo loco pars regulina, quam in varios usus ad aurum vitæ, mercurium philos. medicinam universalem veteres Chymicorum pertraxere. De ipsius reguli amuletica virtute hic nil dicam, neque de iis viribus, quas ab accessione metallorum, quippe

quæ

quæ & ipsa specifica astrali virtute imbuta credebant, mutuatur, præsertim cum notissimum sit reg. ipsum antimonii solarem, lunarem, martialem vulgo ita dictum, nil plane ejusmodi metallorum in sese continere. (Unde nec ipsa ex hisce regulis producta bezoardica solaria lunaria &c. aliquid de istis metallis sortiuntur, frustra que pro tantis alexipharmacis venerantur.) De regulo vero veneris, quem vel nihil plane, vel pauxillum saltim cupri in se fovere alii exaltatione coloris in auro affirmant, uti & de regulo stanni quid sentientum sit, ex superioribus peti possunt. De hujusmodi inquam regulis nihil hic afferam. Minime tamen prætereundus mihi videtur regulus antimonii medicinalis, qui antea etiam pro magna panacea in acutis æque ac Chronicis venditabatur. Inventio hujus medicamenti debetur forsitan solertiæ alchymicorum horumque minus felici experientorum successui, dum, ut auream captarent aviculam, gluten aliquod ἐκ τῆς χύμας καὶ αἰλός parabant, ut ei se involvens, & exinde alas pedesque extricare nesciens, misera illa, etiam invito Jove, in aucupum rapidissimorum manus rapaces deveniret. Ut vero apertius loquar, illius quidem consultissime pro scopo obtinendo tria illa principia metallica, nimirum terreo vitrescens, φλογιστόν, & mercuriale ad mixtionem metalli adhibuisse videntur. Comiscebant itaque terram lapidescentem seu vitrescentem, quæ in alcali sale abunde hæreat, (forte quia metalla sublatis ceteris principiis in terram alcalinam quasi abeant) uti & alterum principium φλογιστόν, quod auri quasi specificum in sulphure antimonii hæere putant, & denique tertium, metalleitatem inducens, mercuriale, quod in terra salis com. quærunt. Quare recte pro scopo obtinendo comixta videntur cum antimonio sal com. & sal alcali, imo & facilius erroris omnis sese expertes judicare poterant propter præsentiam simul reguli antimonii, in quo & sulphureum auri principium & mercuriale sophicum residere judicavere. Cur vero minus voti sui redditi fuerint compotes: hujus loci non erit disquirere. Utut autem primaria intentione atque spe frustratos se esse viderent, ac propterea non immerito animum abjicerent: erexit tamen iterum illos, dum concretum aliquod elegantis coloris, & præstantissimæ, uti observationes indicabant, virtutis sunt consecuti. Hanc itaque ob causam in magno pretio eundem regulum habebant, neque facile arcanum hoc aliis aperiebant. Unde ante pauca adhuc lustra in profundo Democriti puteo latuit, & paucis demum annis pharmacopeorum forulos exornare cepit, qui sibi merito de lucrifero medicamine gratulari, sed breviter, poterant. Quod si vero usum, vires efficaciamque, quæ à Chymiatriis huic regulo adscribuntur, consideremus, depræhendemus illum haberi & usurpari etiam pro medicamine summo aperitivo sudorifero, sanguinem depurativo insignissimo,

alexipharmaco præstantissimo &c. Unde in scorbuto confirmato, lue venerea, gonorrhea virulenta, febribus intermittentibus, obstructionibus viscerum diuturnis & inveteratis, morbis malignis, contagiosis &c. vix par remedium præsentiusque alexicacon inveniri posse putant, ut jure summo panacea dici mereatur. Causas aliquas harum affectionum si inquiramus, eas nec hic quidem ab experientia nec a rationibus chymicis ductas deesse reperimus. Rationes qui inferunt, derivant illas tum ab essentiali quasi reguli constitutione, configuratione, textura &c. tum etiam ab accidentalibus saltim ejusdem configurationibus. Illam maxime largiri reguli sal com. in quo tanta lateat virtus, ut cum reguli ant. mixtum & liquatum omnem venenosam virulentiam, emeticam qualitatem, ei possit demere. Has vero maxime quærunt in colore sanguineo, primo quidem chalybeato, postea vero, si in tenuem pollinem redigatur, purpureo sive ex rubro bruno. Quoad essentialem illam quasi reguli ant. imutationem (1) quidem non negabitur, ejus vim virulentam admodum esse, quod ut & ipse, & crocus metall. merc. vitæ d. vitrum ant. satis testantur, quæ satis magnas spasmodicas & sæpe lethiferas turbas excitare queant. (2) Largietur etiam aliquam correctionem venenosæ illius qualitatis accedere ab admixtione salis com. minime tamen simul asseri poterit, reguli substantiam plane in verti, virulentam vim destrui, & in panaceam infinitarum virium transmutari. Inferunt equidem Chymiatristæ illi, uti modo intelleximus, in sale com. tantam latere virtutem, quæ illud magnum opus præstet. Sed quæso dicas, qualis illa ac quanta vis sit? Si cum Aristotele lis esset, facile præscire possem responsionem. Diceret enim, forsitan esse facultatem aliquam, quam non ita accurate & clare concipere ac determinare possumus. Idem audimus a nostratibus Chymiatristis, esse videlicet specificam talem in sale c. particularum variis figuris præditarum dispositionem, configurationem, modificationem &c. quam tamen ob rei subtilitatem mens non ita aperte percipere potest, neque accurate exprimere. Ast videntur mihi utriusque sortis Chymici qualitatem hic aliquam occultam offendere nobisque obtrudere. Το διότι enim, seu cur sal com. regulum antimonii virulentarum virium in panaceam transmutet, nondum fuit patefactum per illa argumenta, quæ nil nisi aliis verbis thesin exprimabant & petitione principii incedebant. Cum itaque hæc res admodum abstrusa sit & argumenta ignotum per æque ignotum tantum probare laborarent: Quid consilii capiendum? Videtur mihi totum hoc negotium se non alio modo habere, ac fundamentum operationis & præparationis croci ita dicti metallorum Rulandi. Quemadmodum enim hic loci regulina pars a nitro corroditur, invertitur, ac virulenta vis quoad antenus infringitur,

non

non tamen omnino evertitur ac destruitur, uti fit in antimonio varii generis diaphoretico, ob acidi paucitatem atque inopiam, quæ totam reguli texturam dissolvere ac disjicere nequit: ita etiam illud accidit in regulo nostro medicinali, ubi profecto acidum salis com. nil panacealium qualitatum regulo conciliat, sed corrodendo, dissolvendo, imutando ipsi regulo vim illam virulentam quodammodo adimit, neque tamen simul emeticam exuit, ob eandem causam, quam de croco metallorum diximus. Quod vero tam virulenta vomitoria ei non insit vis, uti est in croco metallorum: accidit illud, quia sal com. sulphureum vinculum non ita comburat ac dissolvat, uti nitrum. Ergo videmus, a corrosivo illo acido, quod in sale com. hæret, illam panacealem qualitatem reguli neutiquam provenire posse, imo nec eodem acido vim emeticam virulentiorē penitus posse extirpari. Quod vero imensa illa virtus sub qualitate occulta in acido salis com. lateat, uti innuunt Chymiatrī: per experientiam certe in spir. salis observari posset & deberet. Attamen præter hoc dubium contrariari & illud videtur, quod illud regulinum concretum medicamentosum purum antimoniale sit, & sal com. partim in scoriis remaneat, partim eluatur, & adeo specificam illam efficaciam minime producere possit. Et hæc de prima ratione Chymica, quæ potentiam illam regulo medicinali ab acido salis c. conciliare dicitur. Altera, ut dixi, ab accidente colore potissimum reguli derivatur. Afferunt enim non modo ingens intercedere discrimen inter crocum metallorum & regulum illum medicinalem, quod vel ratione pulcherrimi coloris purpurascētis statim patefcat. Ubi tamen valde dubito, colorem illum superficiale effectum quendam Medicum exferere uti croci metall. color brunus causa facultatis emeticæ dicenda non est. Nihilominus tamen color ille de præsentia sulphuris solaris in regulo med. dat indicium, atque adeo ob hanc causam præstantiæ quid in se latentis. Notum enim est, pro quanta panacea sulphur ant. ob solarem indolem celebretur. At vero idem sulphur numne deest croco metallorum? An non simul, quæ hic præsens oblata emetica virulenta vis, laudabilior diaphoretica, aperiens, mundificans &c. est substituta? Minime hoc testatur experientia. Ergo cum sulphur illud & croco Rul. commune sit: minime ab ejus præsentia regulus med. prærogativam tuebitur, multo minus tantam præstantiam. Quæritur itaque, an non ab alcali, præcellentiam fortietur. Notum autem est, eadem alcalia non modo regulinam substantiam intimius aggredi non posse, sed nil præstare, quam ut fluxilitatem & liquabilitatem promoveant, & sulphureas partes absorbeant, quo eo felicius possit metallica substantia arrodi, & quodammodo noxia qualitas imutari. Quare ex hisce, quæ de rationibus Chymicis adduximus, hoc elicere

cere atque inferre possumus (1) Regulum medicin. panaceam dici non posse. (2) Arsenicalem reguli vim a sale com. non penitus destrui, sed vomitorium adhuc remanere. (3) Eundem regulum à croco Rul. non nisi gradu, differre, majore scilicet hujus vehementia. (4) Neque specificas vires eum vel a sale, vel à sulphure ant. qui colorem purpureum efficit, vel ab alcali possidere. Imò etiam ex hisce non incommode inferri jamdum poterit, quod ille regulus ut alexipharmacum sumum in malignis & panacea etiam in chronicis præsentissima imèrito prædicetur. Perspectis itaque paululum rationibus chymicis, restabunt practicæ, quæ primo loco afferri debuissent. Nam nullius momenti illæ erunt speculationes, si experientia reclamet. Non vero defunt ipsis observationes therapeuticae, quibus stabiliri possunt quodammodo ejus usum in Febris aliisque affectibus. Neque etiam nobis deerunt eadem, multas febres aliosque morbos sublatis per ipsum crocum metall. sive in infuso sive in tartar. emet. adhibitum, generali scilicet operatione emetica. Præponderare tamen illæ observationes nostris videntur ob reguli med. securiorem usum, non solum ob blandum effectum vomitorium, qui tamen raro contingit, sed diaphoreticum & aperitivum. An vero hæc *φανόμενα* contingant ab hujus remedii potentia absolute operante, an vero propter individui constitutionem, morbi naturam, medicamenti illegitimam applicationem id fiat dubito, cum & non nunquam, si eadem cautela observentur, idem effectus ab aliis vomitoriis blandioribus expectari possit. Dicam tamen quæ mihi suspecta videantur, tam circa usum, tum etiam vires & effectus. 1. Notum est, quam incertissimus plane sit ejusdem effectus, imò ut nunquam tutus quis ac firmus de operatione esse queat, dum nunc vomitum movet, nunc salivationem, nunc sudorem, nunc urinam, nunc alvum &c. 2. Nunquam solum & simpliciter in usum vocandum esse præcipiunt, sed cum opiatis, salibus abstersivis, incidentibus, antispasmodicis, diaphoreticis, bezoardicis aliisque comixtum: Unde non nihil clarum esse potest duo talia contrariæ sæpe operationis medicamenta comaritata medium quendam effectum edere, cum unum alterius vim infringat, uti illud in panaceis Starckiana, Wildegansiana & aliis, ubi opium purgantem hellebori vim infringens, & simul suam sopientem virtutem obtundens transit in medium lene diaphoreticum. Mirari vero minime debemus, effectum interdum diaphoreticum salivantem ejus usum insequi. 3. Ast tamen illud observatione constat, si in sensibilibioris habitus corporis hominibus adhibeatur, imò etiam in illis, qui prima vice utuntur, & in largiore dosi, ibi sæpissime nauseam, imò vomitus actuales, anxietates, inquietudines, dolores gravativos, lassitudines &c. conciliare. 4. Quæ denique de virtutibus alexipharmacis in

malignis præsentissimis adferunt : sane imaginaria sunt. Certe enim qui vires & efficaciam alexipharmacorum novit & per experientiam compertas habet : ille non modo reguli hujus, sed omnium aliorum bezoardicorum, quæ e regno minerali petuntur, usu sine ullo incommodo carebit. Quare ex hisce omnibus perspicere licet, frustraneas plane illas esse laudes, quibus hanc panaceam coronare satagunt, quæque ex nulla alia re, quam superstitione admiratione in inventione medicamenti hujus pronata est.

Maximis quoque laudibus evectum esse videmus *specificum stomachicum Poterii*. Multi certe, qui illud in auctoris scriptis non adeo clare depræhenderent & cum ipso Poterio periisse existimarent, maximis doloribus obruti sunt, qui specifico admirandæ efficacæ, exoptatissimo & laudatissimo morborum alexicaco, uti id appellant, imo Medicina vera universi destitutos se esse putarunt. Instituunt autem hujus præparationem in reguli jovialis varia depuratione, per salis alicujus hyeroglyphici, quod agros fœcundet, arbores fructificet, seu homogenei, seu etiam aquæ hermaphroditicæ siccæ præparationem, per solis in oleo ant. solutionem, coctionem, & succedentem hinc vitrificationem, & quæ aliæ ambages sunt, quibus veluti sub involucris arcanum abscondunt. Conabatur hanc præparationem, ut obscuram non nihil, clariorem reddere Etnerus prædictus, qui l. c. id medicamentum confici asserit reguli antimonii solaris pulverisatione, ablutione, exsiccatione & sublimatione in flores rubicundos, quintam essentiam salis in se continentes & horum denique cum triplo nitri, quod sal illud homogeneum hyeroglyphicum est, sæpius iterata calcinatione. Hæc est præparatio magnæ illius panacæ, quæ antehac non nisi sumis difficultatibus, precibus, rationibus moralibus comunicabatur. Enormissime vero in concepta spe decipiebantur, cum tandem nil aliud sunt consecuti, quam simplex ant. diaph. quod jam dudum antea possidebant. Neque enim ab accessione auri, quod magnam, potentia scilicet, panaceam credebant, quicquam boni & medicamentosi accipere poterant, cum regulus ant. intimius connubium auri plane respuat, quod aurifabris etiam aurum a scoriis mediante antimonio depurantibus, & aliis docimastiam metallicam exercentibus, notum est. Quare aurum illa quidem ratione, quam proposuerunt, cum antimonio non comisci, neque cum eodem regulus in pulverem redigi & cum sale am. sublimari eadem ratione potest in flores rubicundos, sed adscendunt solummodo simplices antimonii flores. Multo vero minus idem postea aurum, prout Chymia Physica docet, ab nitro corrodi & in calcem verti potest, cum potius illud homogeneum sal, uti pariter ex docimasticis notum est, aurum, quemadmodum & argentum, magis purificet, & ab aliis metallicis recrementis liberet. Videmus itaque

sub specioso illo specifici titulo panacearum Poterianarum magni æstimatores nil aliud quam usitatissimum illud ant. diaph. esse adeptos, qui ardentissimo illo desiderio & indefesso studio illa, quæ omnibus notissima erant, quæsiwere. Quomodo vero stomachici titulo istud arcanum insigniverint: nulla pariter ratio edocet, nisi forte latius extendere velis stomachicorum munus, ut etiam non incommode purgantia, vomitoria, &c. talia stomachica sint nominanda, quæ remote & per accidens finem illum assequantur. Ita etiam stomachicum hoc operari videtur, dum blandam diaphoresin inducit, motum sang. promovet atque ita accidentarie calorem ventriculi auget & digestionem ita faciliat. An vero ideo specificum in stomachicis affectibus tantumque arcanum dicendum sit, hæc adducta minime affirmabunt. Nam profecto plura dantur pharmaca, quæ & humores vitiosos in ventriculo stabulantes egregie corrigunt, & tonum visceris illius atque robur confortant, & menstruum simul coquendorum ac digerendorum acuant, atque majore longe virtute stomachici officium exsequuntur: minime tamen propterea pro tanto arcano coluntur & specificum etiam salutantur. Hanc enim de specifica efficacia superstitionem facile illeridebit, qui specificorum genuinorum vires, effectus & operationes non ignorat, easque curiose ac sollicitè observare studet.

Ejusdem omnino cum hoc specifico fortis est *bezoardicum minerale* ex butyro ant. abstractione spir. nitri paratum, quod Helmontius jamdum pro magnorum morborum alexicaco exclamavit in hydrope, lue venerea, morbis contagiosis &c. præsentissimo. Nec posterius hujus vestigia deserunt, sed multa industria premunt. Non tantum enim ut magnum sudoriferum incidens deobstruens &c. laudant; sed genuinum & verum alexipharmacum, quod cum nomine omen etiam in malignis petechialibus &c. morbis potentissime tueatur. Quod si vero talia experientiæ responderent; neutiquam certe contrariari quicquam posset, sed potius ut magno invento & impetrato alexipharmaco latandum esset. Sed falli hic expectationem medentium, accuratiores & attentiores Practici edocent, & instar horum omnium esse poterit præcellentissimus Chymicus Ludovicus qui neutiquam appellatione ista dignum esse judicat, nec immerito. Neque enim ulla notabilis differentia ab ipso antimonio diaph. in Therapevtica observatur, neque etiam Chymico Pharmacevtica fundamentalis eadem intercedit. Impugnant hoc maxime nostrates Chymici, qui antimonium diaph. magis iners & partibus activis orbatum pronunciant, non item bez. min. quod activioris, præsentioris & præstantioris sit efficaciæ. Probant hæc tum à priori, tum à posteriori. A priori, quia regulus penetrantissimæ qualitatis a nitro, in igne in alcali verso, in calcem vertatur inertem, quod

quod fit in ant. diaph. At vero in bezoardico aqua regis per spir. nitri in calcem quidem transit, sed longe activiorem, quia spicula illa salina non omnia elui possunt, sed intimius c. substantia regulina connexa naturam induunt sume activam. A posteriori vero illud probant dosi utriusque medicamenti. Illud enim asserunt, scilicet ant. diaph. ad dr. i. adhiberi debere, si felicem effectum ab ejus usu sperare velis, hoc vero bezoardicum etiam ad scr. S. sufficere, largeque vires suas prestare. Utrumque vero hoc argumentum non id, de quo dubitabatur, confirmat, sed æqualitatem solummodo virium ant. diaph. & bezoard. min. tollit, & hoc presentioris efficaciam, quam illud esse, docet. Equidem placet rationi illæ a priori desumptæ hæc apponere 1. Negatur, nitrum in præparationem antimonii diaph. in alcali verti, quod & regulinam substantiam imutet, & inertem reddat. 2. Acidum nitri regulum ant. ita corrodere & invertere, non vero alcali, constat ex Chymicæ fundamentis. 3. Nec diversum acidum est in bez. min. ab illo, quod est in antimonio diaph. acidum enim nitri a consortio alcalini salis abstractum non plus hic loci præstat, quam in concreto suo adhuc existens, ob vim φλογιστῆ, quod in utroque calcinationem efficit potissimum. 4. Nec patet, bezoardicum min. spicularum acidarum plus retinere quam antimonium diaph. 5. Nec denique ab istis spiculis qualitas bezoardica est derivanda. Cur enim postea largius adjectum acidum non tale præstat? 6. Si plus acidi inest bezoardico min. quam diaph. antim. debet notari discrimen aliquod in effervescentiis c. acido. Atqui nulla &c. E. Ad posterius vero argumentum illa saltem regeo 1. Negatur antimonium diaph. si rite præparatum sit & legitime adhibeatur, ad dr. S. & i. effectum aliquem diaph. edere, sed in scr. S. & i. datum æque sufficere. 2. Bez. semper ad scr. S. datum laudabiles vires exserere diapnoicas. Ubi enim vel ob subjecti diversitatem, vel temporis rationem, vel aliarum circumstantiarum quasi contrarietatem ant. diaph. in larga dosi nil proficit, ibi nec bez. min. efficacius erit, etiam si in eadem dosi adhibeatur. Maxime hoc observamus in febribus aliisque morbis acutis, ubi sæpe incommodo plane tempore, contrariante naturæ intentione, largam diaphoretici quantitatem exhiberi videmus, sine ullo sudorifero effectum, quem nec regimen simul calidum imperatum elicere potest. Sed potius pori cutis arctius constipantur, æstus internus intensissimus fit cum anxietate præcordiorum, dolore capitis, imo etiam delirio & aliis symptomatibus. Ast vero si temporis punctum legitime observetur, tum & paucissimum diaph. pulverem in iusto regimine observato feliciter operatur. Et denique 4. ambigua res est, contradictionem aliquam involvens, nimirum acidum præsertim vini diaphoresin intendere & augere, cum potius acida in cras-

fando, inspissando & coagulando sanguinem isti fini plane contraria sint. Unde sæpius observatur, acida saltem extrinsecus applicata sudorem suppressere, & versus interiora repellere, id quod ab epithematis talismodi usu paucis abhinc diebus annotavi evenisse. Quare ex hisce videmus, bez. min. paucum aut nihil ab antim. diaph. differre, multo minus vires promissas alexipharmacas edere. Eadem ratio est *cerussæ antimonii*. Etsi enim multi eam sudoriferum magnum, bezoardici min. vires exsuperans, pronunciant, quodque venenis & pesti adversetur: nihil tamen prout & pharmacopœorum famuli norunt, ab ipso antimonio diaph. differt aut præstat, ut absurdum illud cōmentum de virtute antipestilentiali hic non repetam. Nec ab hisce recedit pulvis ille albicans, qui nonnullis *nix antim.* aliis materia perlata Crygeri dicitur, & ex aqua edulcorativa antimonii diaph. seu cerussæ ant. c. urina præcipitatur. Summum hoc Medicamentum dicit esse D. Junkenius in malignis, maxime si urina præcipitatum fuerit. Sed certe magnum damnum nobismet ipsis inferimus, dum ita affusione urinæ sal illud nitroso vitriolicum seu sulphureum egregium abstergens, incidens, digestivum &c. invertitur. Pariter *sulphur ant. nitro fixatum*, utut idem D. Junckenius universalem Medicinam nominet, nil aliud est, quam regulinæ particulæ, quæ adhuc in sulphure ant. hærebant, ab acido nitri in diaph. pulverem conversæ, atque adeo hoc nulla ratione ab ipso cōmuni antimonio diaph. differt. Ita etiam exacte cum eodem ant. diaph. convenit *mercurius vitæ c. nitro fixatus*, & ne hilum quidem ab illo recedit, uti primo intuitu statim cuivis patescere potest. Quocirca depræhendimus aperte, in quam vanas opiniones abrepti fuerint Chymiatři, ut ea, quæ conveniunt, diversis qualitatibus ornare, diversis dosibus in formulas conjicere collective quidem, tanta cura inquirerent.

Sed sufficiant hæc de pharmacis antimonialibus diaphoreticis, quæ ex parte antimonii regulina producuntur. Examinemus nunc etiam paucis illa, quæ alteri antimonii principio originem suam debent. Notum autem est, veteres Chymicorum, imo & recentiores, maximas vires, summam Medicinam, imo omnium metallorum quintam essentiam in *sulphure antimonii* quæsisisse. Causa, quæ ipsos adduxit, hæc potissimum erat, quia magnam cognationem cum auro alat, quod patet, quia & colorem rubicundo flavescens habeat, auro colorem splendidum conciliet, & a sordibus aliorum metallorum & mineralium depuret. Ubi quidem præter ea, quæ supra de parte auri inflammabili diximus, notari potest, aurum crudius & obscurius cum antimonio fustum repurgari & colorem nitidum recuperare non ob analogiam sulphurum, sed quoniam reliquæ scorix & metalla per

antimonium absorbentur, in calcem vertuntur, ut deinde aurum, ab horum connubio liberatum & ab antimonii consortio etiam secedens, ad fundum propter suam gravitatem specificam secedere queat. Illud maxime illustrari potest depuratione argenti a stanno per nitrum, auri a venere per sulphur &c. Sed ut rem potius nostram agamus, magnam inquam panaceam & arcanum veteres Chymici in sulphure antimonii ob dictam cum auri cognationem hærere existimabant: prout multa de talibus pharmacis promittunt Basil. Valent. Theophrast. Paracelsus, Helmont. Monte Snyd. Philal. &c. Insistunt horum vestigiis multi etiam recentiorum. Sed si omnes istas *panaceas auratas antimonii*, *ens ant. Primum ens auri Claub. tinct. ant. solares, bals. ant.* & alias infinitas ejusmodi medicinas universales perpendamus: reperiemus, eas fere omnes in uno convenire, nec ab ipso com. sulphure ant. in ratione vel Chymica vel Medica abludere, modo ipsis panacealis appensa hyperbole dematur.

Equidem haud inficior *sulphur ant.* bene paratum vel abstractione aceti, vel alia correctione, quo nausea, anxietatesque comunem usum utpl. insequentes avertantur, & cum judicio debita continuatione adhibitum in cachexiis & aliis chronicis affectibus aperitivum & resolvens non contemnendum evadere: quis tamen ideo dicet panaceam? Ita certe *panacea solaris ant.* sive ens primum auri Claub. cum liquore alcahest confectum, nihil aliud est, quam sulphur ant. simpliciter cum nitro fixo ab antimonii regulo sejunctum & acido aliquo vel tartari vel aceti vel vitrioli &c. præcipitatum. Attamen notum est, pro quando arcano venditatum fuerit in paralyfi, podagra, hydrope, lue venerea, febribus, omnibusque morbis chronicis. Ejusdem prorsus sortis est *panaceæ famosæ Hartmanni, Conerdingii &c.* quippe quæ licet spiritu sulphuris aut alio acido correctæ videantur, minime tamen ab antimonii sulphure com. rite parato recedunt, neque tanta sunt arcana in lepra, scorbuto, lue ven. &c. uti existimantur. Similis furfuris est pulvis mirabilis dictus, s. sulphur antimonii tertiæ præcipitationis, qui nuperrime iterum celebritatem reducere cepit, ob universalem per omnia evacuatoria depurandi efficaciam, cui postea eo commodius astrum salis pro roborando archeo substitui & ita omnium morborum medela tuto feliciter ac jucunde absolvi possit. Promissa jucunda, si successus responderet. Astrum solis erat essentia granorum Kermes; astrum lunæ spiritus urinosus ambratus. Videmus qualia sint in præmissis, eadem fore in successibus. Eadem etiam, quæ in sulphuribus ant. videmus, depræhendimus in *tincturis antim.* quarum magnus numerus est, non diversitatem virium ostendentium, sed varietate solum

delectantium, cum omnes non specie, sed numero saltem differre videantur. Ita profecto quinta illa essentia ant. ex fl. ant. c. sale am. ex Scor. ant. sublimatis, c. spir. vini extracta an aliud quidpiam præter antimonii tincturam communem continet? Nihilominus hoc arcanum in maximo pretio a Basil. Valentino, Hartmanno &c. habebatur, ob plurimum ejus & maximum & in Medicina & in Chymicis usum. In Medicis panaceæ usum ipsi tribuunt, quæ insensibiliter morbos omnes incurabiles tollat, quæque præcipue pestis, paralytis, melancholiæ, hypochondriacæ, omnium febrium, remedium specificum sit. Næniæ sunt, jamdum explosæ satis. In Chymicis usum ejus exoptatissimum esse asserebant in lapide Philos. alterius præparando. Utrumque vero hunc assignatum usum hyperbolicum vanum admodum & inanem esse, quilibet facile perspiciet. Pariter *tinct. metall.* tantis laudibus ad cœlos sublatam esse quis non videt? In confortando viscerum tono, obstructionibus pertinacissimis viscerum referendis, scorbuto confirmato, lue ven. breviter curandis vix præstantiorem sub cœlo medicinam dari sibi persuadebant. Neque id ob vires sulphuris ant. sed maxime ob metallorum accedentium & regulum ant. ingredientium tantos effectus deducebant. Notum autem est, adjecta illa metalla cum regulina substantia per fusionem plane non commisceri sed in scoriis remanere. Unde scilicet illud sulphureum, quod in regulo ant. cum nitro fusoria depuratione acquirimus, non sulphur metallorum, sed antimonii solummodo, quale in regulina parte adhuc hærebat, foetum est atque refertum. Unde rectissime hodie plurimi metalla prædicta ex commixtione cum reguli plane, ut rem inutilem nec necessariam, excludunt, salque illud succinei coloris & consistentiæ (quod etiam D. Junckenius in Chym. pro magna panacea venditat, quia pulvis tenuis leniter emeticus, Ramoneur dictus, exinde elutriari potest) è regulo simplici parant. Ex quo postea sale mediante spir. vini bonam quidem tincturam alcalinam instar tincturæ tartari, eamque non inefficacem consequimur, nequaquam vero illam superlativarum virium, de qua modo diximus. Alia est *panacea* cœlestis, quæ ex *Vitro ant.* à quo spiritus veneris post digestionem abstractus est, cum spir. vini extrahitur, quam in depuratione sanguinis, lepra, cancro, lue venerea, contracturis, apoplexia, hydrope, epilepsia, peste pro summa medicina habebant. Imo Willisius de M. convulsivis cœleste remedium eam ad longævam vitam consequendam pronunciat, si vere & autumnopauca de ea guttulæ assumantur. Ast vero magnam differentiam huic & vulgari tincturæ intercedere vix mihi persuadeo, cum spiritus veneris tantam alterationem & accessionem virium non possit præstare, licet non ita alcalinæ naturæ uti priores sit. Neque desunt
su-

superlativæ illæ laudes in *balsamis ant. Variis*, quæ pariter gravissimorum morborum alexicaca salutantur. Ita nota sunt, balsamum ant. comune panacea Hartmanni, Basil. Valent. ex sulphure ant. cum oleis aromaticis, extracta, uti & Clauberi balsamum ex antimonio c. sale suo mirabili fuso, c. ol. succini extractum. &c. Quæ vero, uti & aliæ plures descriptiones a vulgari methodo, talia balsama conficiendi, quoad præparationum fundamentum minime differunt, sed in eo omnes conveniunt, ut sulphureæ ant. partes a sale, vel alcalino, vel medio evolvantur, recludanturque prius, ut postea eo facilius menstruum oleosum aromaticum, vel aliud expressi olei particulas sulphureas absorbere, imbibere & in poros recipere queat. Idcirco scorias reguli antimonii c. aqua vel simplici, vel calcis vivæ coqvunt, filtrant & inspissant ad siccitatem. Remanenti postea sali antimoniali coloris subflavi, quod etiam tinctura antimonii sicca nominatur, affundunt ol. amygd. tereb. junip. item olea aromatica, nec non menthæ, anisi vel alia ejusdem generis, atque ita prævia digestionem accipiunt balsamum aliquod antimonii. De omnibus vero hisce balsamorum generibus magna illa præter alias imaginaria opinio notanda est circa eorundem usum Chirurgicum, quem nescio in quem cælum efferre solent ob vires sumas in ulceribus inveteratis foetidis mundificandis & consolidandis conspicuas, sive interne sive externe, sive utroque, quod præstet, modo adhibeantur. Ast vero interne, dum loco florum sulphuris adhibentur, parum ad sang. lymphæque mundificationem præstant, ut hyperbolicas illas vires multis parasangis antecedit usus vegetabilium mundificantium & ulcus purgantium; uti sunt rad. helen. ari. pimpin. alb. bardan. vincet: L. sassaf. Sant. citr. quajac. H. scord. chæres. beccabungæ, saniculæ, pyrolæ, cent. m. millef. & alia plura, quæ Paracelsus tr. von den Spital-Kranckheiten recenset. Externe vero in consolidatione partium exsanguium aliquid præstare videntur, ubi subtilissimas ulcerationes glandosarum partium demulcent. Attamen efficaciam eorum balsamicam hic facile, si non exsuperat, æquat certe balsamicorum comunium usus ol. tereb. ol. vitell. ovorum & aliorum oleorum temperationum balsamicorum nostratium & peregrinorum. Taceo quod abstinere ab ejusmodi oleosis præcellentius sit remedium in plurimis casibus, quam iis unguinosis & æstuosis simul ardores & ulcerationes foetidas augere. In illis enim partibus, quæ diversæ sunt consistentiæ, ut sanguiferis, osseis, tendinosi, vel nihil ad mundificationem & consolidationem conferunt, vel detrimenta magis conciliant, uti eorum usus in apostematibus & ulceribus simplicibus declarat, quibus iniquationes dysepuloticas inducunt, dum partes subtiliores auferunt humorum, reliquos vero inspissant & tumorem ulcerosum magis indurant.

Ubi

Ubi utique in talibus casibus magnæ illæ panacæ balsamicæ c. myrrhatis & succinatis vulgaribus remediis ne quidem comparandæ sunt.

Aggredior nunc aliud mineralium genus, & quidem *arsenicum*, ubi brevibus illam solum superstitionem, eamque sume nefandam atque horrendam, circa usum ejusdem contra febres intermittentes, maxime vero tertianam, veluti specificum in castris adhuc pro celeri morbi cura usitatum, notabo. Ubi equidem duo gravissima vitia sceleratorum ejusmodi nostri temporis Anchiatorum quorundam detestanda, execranda & perstringenda veniunt, nimirum horrenda illa temeritas & crassissima rerum medicarum ignorantia. Execranda certe pestiferorum illorum hominum temeritas est veneno illo, omnibus aliis gravissimo, motiones febriles tertianas, in bonum finem ad vitiosos humores e corpore eliminandos a natura institutos, nec unquam per se in vitæ discrimen ducentes, suppressere velles. Unde semper ex tali temerario conatu & nefando usu sævissima symptomata insequuntur, enormes angustiae, angores, anxietates, vertigines, mentis turbationes, syncopticae cardialgiae, convulsivæ totius corporis concussiones, convulsiivi repentini raptus artuum, suspiria lamentabilia, luctuosa, profundissima, sudor copiosissimus gelidus, aspectus metuendus & horrendus, & denique mors, post quem cadaver nigrum foetidum mox apparet, & membrum virile turgidum & penitus nigrum. Qui vero naturæ bonitate ex tali tragoedia evadunt, illi, nisi errorem hunc postea vel revocatione febris, vel accuratiores vitæ genere & remediorum aptiorum usu emendant, obstructions viscerum pertinacissimas, febrem lentam, hecticam, acutam, inflammatoriam, tabem mortiferam, paralytin, hydroperem &c. sibi accersunt. Ex quibus profecto perspicere possumus, quanta temeritas hæc sit carnificum & homicidarum, qui omni conscientia & scientia exuti, neglecto hominis, ne dicam Christiani, officio, ita scelerate in miseri proximi, qui omnem restitutionis fiduciam in illo pessimo anchiatro collocat, viscera sæviunt. Alterum vitium vero crassissimam eorum in arte Medica ignorantiam atque stupiditatem nescio an rideam, an vero doleam. Vident nonnunquam, imo sæpe, licet cum gravissimis symptomatibus imo vitæ periculo illud fiat, febriles motus uno quasi ictu suppressi. Quomodo vero talia accidant, quæ causa sit Physico Medica, illi albæ mentis homines neque pervestigari possunt, neque cogitatione id assequi valent. Certum enim est atque prorsus clarum, non illud ob occultam aut specificam arsenici qualitatem evenire, uti arbitrantur, sed causam plane manifestam illius phænomeni esse. Natura enim humana in id unice tempore paroxysmi intenta est, ut materia vitiosa, in primis viis contenta, corrigatur, secernatur & comode evacuetur. Quare congestiones humorum

copiosiores ad has partes procurantur, (id quod constrictio totius externi habitus, corporis aspectus macilentus, tensio artuum, frigus &c. indicant.) Serum copiosius separatur, quod attenuet, deliquescat materiam viscidam, tenacem, lentam, & ad motum disponat. Quod si feliciter primo statim paroxysmo tale institutum succedat, tum finito eodem vomitum vel etiam postea diarrhoeam contingere videmus, cum ipsius sæpe febris solutione, aut mitigatione ad minimum. Cum vero hæc ita in corpore humano vivo geruntur, cum tales motiones ad materiam peccantem excernendam perficiuntur: tum certe aliter fieri non potest, si talis arsenicalis panacea ingeratur, istum motum aut plane suppressi, aut ad tempus sisti, aut divertit. Binis enim istis nocivis materiis natura uno tempore, uno eodem modo, invigilare nequit. Quare, ut istud munus, quod non ita grave & exitiale est, dimittat, necessitas moralis suadet. Certe enim, nisi natura huic fontico & exitiali veneno succumbere velit, necesse est, ut ceterorum actionum mitiorum quasi obliviscatur, & ad hoc malum evertendum omnes vires intendat. Id quod ex causa morali fieri debet, quia arsenici venenum multo nocivius est quam materia febrilis, quæ placide sine turbis excerni potest. Fit igitur ita, quod a posteriori maxime patet. A priori vero illud ita fieri, prout differuimus, testatur usus in fundamento rei similis Chinæ Chinæ, opiatorum, animi affectuum, sollicitudinum, oblivionis, terroris, doloris &c. Ubi utique motiones tales in consuetudinem adactæ & conversæ alio contrario motu per illa quasi specifica sedantur & opprimuntur. Patet itaque non modo *ἵνα*, sed etiam *ἵνα διότι* operationis febrifugi illi venenosi. Ut τὸ tale enim venenum febres tollit, morbum vero minime curat, i. e. motiones istas salutares ad materiam vitiosam evertendam suppressit, vitium vero seu causam occasionalem neque corrigit neque excernit. Atqui dices, si nihilominus febris tollatur, etiam si graviora symptomata comitentur, an inde usus tollatur festinantis medicationis? At ego inquam, si 100. isto medicamento à febre liberentur & ex his aliquot solum fati cedant, imo unicus saltem, annon homicidii eris reus? Quæ erit tibi conscientia? Nec enim inscius talium effectuum eras. Imo si nullus illico ista panacea enecetur, numne ignoras, in quam pessimi moris catastrophem ipsa febris in se benigna transitum faciat? Sed prætereo talia incommoda, quæ quemquam bonum virum ab ejus usu abducere valent. Mitto rationes Theologico Morales. Mitto vitæ præsentissimum periculum. Mitto morbos gravissimos, qui ejus usum insequuntur. Perpendite modo, carnifices, sæva illa symptomata, quibus præter omnem necessitatem & utilitatem ægros excruciat. Magnam sanè vos dementiam cepisse necesse est, ut morbum placide decurrentem & prudenti tractationi

facillime *ἀνυδινῶς* cedentem remedio illo, plane morbo graviore aggrediamini. Detestatur & rejicit tale consilium ipse Hippoc. dum ait: Pharmacam morbo graviora metus est propinare. Si enim bene cadant, temeritatis & impudentiæ reus est, si male eo magis inculpandus medicus. Sine ulla difficultate abigitur febris talis, modo illi medendi methodo, quam natura nobis monstrat, insistamus, omnisque medicatio justo tempore & apto regimine applicetur. Neque vero est contrario in aliud extremum prolabendum est, & ad motus immediate & actu sistentia & sopientia per anodyno-opiata, adstringentia, chinata, confugiendum: sed eo allaborandum, ut natura in correctionis secretionisque opere tempore paroxyismi adjuvetur per digestiva incidentia vitriolata salia, absorbentia, amara, Gtosa &c. Atque ita deinde remota causa occasionali eo tutius motiones febriles assuefactæ per sopientia illa, adstringentia, diversos motus producentia &c. sedari & averti queunt. Hac ratione per Dei gratiam curatur morbus non supprimitur. Aget ita non modo ex arte scientificæ, sed etiam secundum conscientiam medicus. Curatur sine istis turbis, sine vitæ discrimine, sine mali recrudescentis metu, sine pejororum affectuum proventu. Pendet ejus modo arsenicalis sævitia ab heroicorum emetico conamine, quo sine multa therapeutica aut pathologica consideratione in morbum quemvis irrucere libido aut ignavia docuit. Sed temeritatem hanc heroicam non minus, ac inde forte prognatam arsenicalem virulentiam damno, cum ratio & experientia doceat, leniorem & tutiorem viam semper prærogativam mereri. Restat hic illud Anchiatrum dubium solvere, quod ad stabilendum arsenici usum obtrudunt. Existimant minime illa generali, de qua antè diximus, operatione febres tollere, sed specifica quadam ignota virtute. Quare, si ab indole ejus penetrantissima deturbetur & arte Chymica fixetur arsenicum: tum pro robustis rusticis antifebrile tolerandum evadere. Tradidere tales præparationes fixatorias & cicuratorias Königius in r. m. ubi & experientiam multam per mortes haustam adjecit, & alii multi. At vero facile ex superioribus intelligi poterit, si arsenicum fixetur, & vi sua truculenta omni eximatur; tum certe nullius hic plane esse usus, & ab efficacia febri-fuga tantum quidem abesse, quantum illi ab omni sana scientia & experientia. Si vero ipsæ fixationes & cicurationes examinentur: neque experientia neque ratio respondere depræhenditur. Communiter nitrum pro correctorio arsenici esse arbitrantur. Igitur simplici saltim via id arsenico trituratione & pulveratione admiscent. Alii fusionem eligunt. Sed quanti hi sunt Medici, tanti etiam sunt Chymici. Quantum enim sulphuri fixitatis ab alcali accedit, tantum arsenico a nitro. Huc etiam per-

pertinet usus arsenici in cancro. Cum enim cancrum vivum aliquod animal esse existiment, quod corpus perrepando partes solidas aggredia-
tur & ulcerosos foetidos tumores producat: ad hunc enecandum istud
venenum quadrare existimavere. Sed quam tristissimo eventu talis me-
dicatio fiat, experientia testatur, ut eam hodie repetere ne stupidus qui-
dem amplius audeat. Ita internæ angustiae, anxietates, turbulenti spasma-
dici motus longe ultra solitum increbescunt & facillime ad status febriles
gangranodes, convulsiones catastrophem faciunt. Quare ei & hic effe-
ctus prodeunt, qui omnes bonos a tali medicatione merito deterrire pos-
sunt. Ex hisce itaque omnibus clarissime patescere arbitror, pessimam
fane hanc esse Chymiatrorum superstitionem, quam de utroque dicto
arsenici usu foveant. Hæc vero certe ex nulla alia re, quam summa
ignorantia geneseos effectuum talium, ortum suum habent, quippe quæ
scelestos illos conatus producit. Inexperientia temeritatem producit
dixit Hippocrates. Cum enim indagare vera pigeat, dicit Plinius hist.
nat. l. 5. ignorantiae pudore mentiri non placet. Mendacium & audacia
aliquomodo ignorantiam tegunt. Cum itaque & nostri causalitatem
istiusmodi effectuum ignorent: istud Hippocratis monitum observent,
ubi prorsus ab exercitio medico desistere jubet.

Sed sufficient hæc de stolidissima illa & nequissima superstitione circa
usum arsenici adduxisse. Ubi quidem, quia jam longius, quam par est,
profectus sum, commode in regni mineralis & medicamentorum ex eo pro-
ductorum superstizioso abusu finem facere possem. Sed cum ad minera-
lia vitriola varii generis revocentur: placet occasione eorundem pauca de
acidorum usu subjungere & in specie recentiorum circa eadem meticolosi-
tatem attingere, quippe qui minime in usum Medicum internum tutum,
securum & felicem trahi posse existiment.

Acida pertimescunt Chymiatři ut corrosiva, præsertim qui omnes
vitalitatis læsiones ab acido coagulante, uti primaria ac fundamentali
omnium morborum causa, deducunt. Et multi, acida propinare, tam
virulentum existimabant, quam guttulas mercurii sublimati porrigere
hauriendas, quod ex timore superstizioso Chymiatricæ pronatum est, uti
priora idola ex amore similis crudæ Chymicæ ædificata. Sane guttulæ
acidi alicujus, etiam mineralis, spongiosorum æstum tuto temperant,
uti sicciorum temperamentorum ardores cholericos nitrum simplex, usu
certe summe polychresto, ac vere panaceali, moderatur, simulque ma-
teriam acrem sulphuream obtusam per urinam evacuat. Nil hic metuen-
dum, nisi quando commotiones pectorales subsunt, quas acida in vehe-

mentem tussim, maxime salis communis acidum, exacerbant. Obsoleta fieri coepit hæc meticulositas, cum alchymici ex acido oleo vitrioli panaceas exstruere iterum suscipiunt, imo jam in officinas publicas tinctura balsamica nitri ex ol. nitri (â nitro per ol. vitrioli abstracto) cum spir. vini dulcificato parata, & rubore tincta abiit, ut aliud quid, quam spir. nitri dulcis in promptu & cultu novo foret. Sed est profapia superstitionis.

Subsisto vero in his speciminibus superstitionis Chymiatricæ, quæ jam exercitatis nota lubens prima hac vice adduxi, ut in postera pro- & deductione eorum idolorum tanto magis pateat nostræ ætati, in quibus vanis mysteriis sagacitas hominum sæpe immergatur, immoretur & immoriatur, donec vanæ spei lacticinia, & lenocinia experiatur, & ad rei solidæ, non fucatæ, & veri, boni, indagacionem & impetrationem aditum apertum depræhendat. Chymiatri evenit, quod Cornel. Agrippa doctis accidere in vanitate scientiarum edocuit, ut per multas ambages, recessus, scopulos, carbunculos perreptantes tandem cognoscant, se fumum & fucum interea tanto nisu captasse, tempus jam esse, ut cum asino in doctam simplicitatem etiam in culina Chymica sese vertat animus, ne vitam brevem in arte longa in umbra aucupanda desperdat, id quod in altera deductionis Chymiatricæ superstitionis parte clarius & utilius pro nostro ævo demonstrabitur.

